

自在村人藏

攸縣志  
七

攸縣志卷四十九

藝文

知縣事

建水趙勤纂修  
仁和萬在衡

文不一體劉舍人論之詳矣攸自彭博士蜚聲於宋  
馮待制振藻於元爰逮有明或遇微行而賡詩或由  
弱齡而獻頌御河烟柳播館閣之先聲瓊島春雲聯  
詞垣之雅什莫不揚扈得體藻耀高翔若乃經術師  
承文章流別論策醇茂羌古言之包纏序記詳明信  
予懷之杼柚凡扶質以立幹並垂條而結繁往製足  
觀清裁悉協爰輯其有關於地志政教者錄舊增新

爲一帙云志藝文

勅

宋徽宗賜潭州攸縣司空山陽昇觀張岳勅

自昔有道之士其精修元妙則獨善乎一身士苴緒餘則遺惠於來世真人之跡肇於南齊以迄於今垂千百祀其自得者固已入乎希曩微妙之域出乎道氣形質之表夫豈易測也哉至於興求感應利人濟物之功久而彌著非期於人之聞知也亦其緒餘之所及者如此賜以號名仍庇羣土可特封太素真人政和三年七月十五日

宋徽宗加賜潭州攸縣司空山陽昇觀張岳勅

朕於上世之士凡有一概可稱者未嘗不錄異而旌顯之矧清都紫府爲神仙家流者乎考其肇自南齊躡蹤蘇隱捨冠冕之榮華趨山林之槁泊持大戒誦真經積行累修功踰三千羽化冲霄迄至於今靈跡具在凜然可觀以致旱乾水溢禱祈輒應庇佑下民遺惠多矣錫之美號庸示褒封仍冀含生永資道蔭可特封太素冲昇真人政和三年八月二十五日

明憲宗諭祭兵部右侍郎王偉勅

爾發身賢科進學翰院歷官卽署屢効勤勞遷亞夏官能聲益著比罹讒詆退處林泉方圖委任於將來豈意訃聞

於中路特命有司爲營壘祭爾靈不昧庶克是歆

明神宗加爵廣東昭武將軍輕車都尉劉葵勅

致治必資文臣戡亂定須武將邊報黎寇擾亂瓊雷二府急須掃除以安民生爾進士出身官粵東昭武將軍輕車都尉劉葵才猷素著武略夙嫻雖係戴罪朕今覽爾奏圖既已稔悉黎壤自易蕩滌黎亂特是命爾廣招精兵統軍率屬星速征勦勤王敵愾釋罪加爵萬歷四十三年

賦

遊許昌賦

洪雲蒸

乙卯春余謫許昌許鄭侯有同志之雅不責余以吏事余以其閒得周覽鄭侯諸規制至講學一節係余素志朝夕以德業交儆更覺栩栩適也奈三閱月余以差歸是不可無言以紀事思古人以政事被詩歌非其有侈心而誇耀後人謂矇瞽誦之則宛然如已事之在目而怵然爲戒不敢怠違是以已爲鑑也然而人誦之亦復如是是又以人爲鑑也二鑑存焉其能已於言耶乃賦曰



維乙卯之歲兮侯罪許昌單車就道兮王事不遑白  
龍大龍之坡兮惟荒蕪之浩渺哀流亡之不及兮苦  
賠累之驚擾惟侯出舍於彼兮四顧而與之謀咨荒  
畎之端委兮惟潁水據其上流自禹襄而下注兮經  
小龍口而曲折悵茲口之卑隘兮逢洪濤而潰決我  
居我稼兮盡淪水穴築堤以障瀾兮斯開荒之上策  
侯曰爾營宜堤者三相勢緩急大小焉參計堤幾何  
堤長攸司計夫幾何限地營之下廣上狹土力足支  
距河少許激濤乃差就近居民築斯如雲六百丈奇  
成功二旬大小眠龍高堅永寧外水不侵厥堤之功  
內水不洩外患復同維白龍之爲坡兮四望平壤溝  
渠烏有兮積雨汪洋命開河以導之歸兮居民紛其  
勸勦建河長兮董役各認地兮奮揚未匝月兮計日  
十三里兮絜長大地荒茫尙宜建庄苟爰居之阻遠  
兮卽耕獲之或妨思井田之八家兮各宅其中央命  
堪輿以卜居兮選旺而嚮方置庄一所二十其扉他  
所攸同環堵依依前門汲井後戶耘耔厥材維河不  
採於山學使有棚轉運甚閒厥費維何不需於民若  
石若斗大倉陳因趁茲開荒草根其遺下令拾取懸  
錢而之婦子鱗集以應不訾慮開荒之府弊兮宜始

事而杜萌報地之妄冒兮吾懸文以澄清按地以核  
畝兮賦與相并按畝以招流亡嚮赴而耕苟此出力  
而彼後至兮卽故業不得與之爭惟荒地之零星兮  
給穀以聽其營至原田之成片兮監視以董其成厥  
牛惟百厥價倍之厥牧惟芻厥監散之日可成頃厥  
牧操之日無虛牧厥監督之誰冒之牛宿蠹斯已誰  
侵之料靡細弗理人所可能於焉則止乃相厥土燥  
濕異宜五日弗雨苦燥弗滋偶或滂沱苦濕而泥一  
燥一濕犁鋤安施以日定頃惟天之爲侯惟祈天雨  
暘厥時八百維頃踰月是期荒開宅成既盈時思穰  
穰于婦旣樂業思養之有緒教宜亟施乃侯甲寅之  
季已營澤宮大殿宏敞其規制廊廡繽紛其有容明  
倫之堂偉宮牆之數仞誇壯麗之雄風捐百金以爲  
倡閱二月而竣工然課士不可無地儲材宜置之館  
乃於學宮之左聿成號舍之煥堂曰嚴師閣曰尊經  
臺名太極道洲沙汀因之品士是以名亭左號維八  
右焉適稱號各一院列屋三楹維牆照之南向而明  
左右旣列外置二廳東曰謹肅見修真之在日用西  
曰強恕見一言可行終身復闢之園復種之筠乃集  
諸生乃命書詩根窮月窟源溯天池發昔人之未有

點承學之初知每月有課三以爲期濟濟多士是學  
是思維彼東南是名巽方宜聳宜特實應文昌乃建  
浮屠之塔象插漢之轡乃鳩工從事庀材相將計層  
則十有三深基維石是盤乃中室而外欄可周遭而  
徬徨許罷之良實惟文莊專祠祀之以烝以嘗後爲  
寢廟赫赫名賢之所前爲鄉約皇皇聖諭之堂二十  
四字註脚六經悖之則凶修之則寧維朔暨望解醒  
以醒誰則無耳盍以心聽西湖書院維許之隅環池  
爲帶光涵太虛維院之堂積翠盈除有斐亭內花竹  
扶疎昔程夫子於焉停車伊洛淵源卽筌卽魚乃卜  
之吉乃定之名乃召師儒乃集簪纓乃懸之像儼然  
主盟望光展拜執經乞明厥明維何只今此心厥心  
維何曰聖與仁厥仁維何立達無垠不厭於己不倦  
於人是名默識千載一真孔孟師友堯舜君臣總維  
這些時乃日新胡以暴棄孝弟最親譬火之燃薪以  
傳薪濟濟多士終日諄諄侯會而罷視事厥庭余於  
是知政之有本作而嘆曰維昔之人戴星兮誰俾爾  
勤一鶴兮誰俾爾清爲雷爲電俾神奸膽裂而頸縮  
兮誰俾爾誠爲雨爲露俾窮民潤澤而豐美兮誰俾  
爾仁似經似緯似條似理兮誰俾爾文迎而輒解觸

而輒斷兮誰俾爾靈是有本兮不可易致鄭侯曰吾  
與子其遜志

遊黃鶴樓賦

陳待舉

黃鶴何年兮一去斯樓亘古兮常留壯鄂城之西渚  
兮納漢水之東流俯晴川之高閣兮瞰芳草之長洲  
招鳳凰以爲侶兮狎鸚鵡而同遊爾乃棟聳梁雕翬  
飛鳥革閣分八方影搖千尺牕含亂峯之青欄憑斷  
岍之碧帳鶴羽之蹁躑兮冀神仙而莫卽若夫春花  
初放兮雉堞生香薰風乍起兮殿閣微涼秋月懸堦  
兮光繞垣牆瑞雲飄檐兮輝映廊房四時之景不一

皆足以助斯樓之眺望於是名公鉅卿騷人墨客或  
駐馬而停車或載酒而攜展或長嘯於風雪之餘或  
朗吟於花月之夕啣杯聽漁唱之優游倚檻睇帆檣  
之絡繹繫長江於一葦鼓飛燕之雙翼曉看萬家之  
煙火兮裊裊相聯夜聽兩郡之鈴柝兮沉沉不歇景  
物堪描江山猶昔日曠神怡心恬意適恍若跨鶴兮  
而翔九天憑虛兮而遊七澤至於桃留在石棗傳如  
瓜笛聲難再仙夢尙奢此又司勳之所弗及當爲好  
事者之踵事而增華嗟乎黃鶴兮何從來昔人兮何  
所徃徒令我登樓而作賦寄懷於悠悠白雲之上

醉墨亭賦

劉起光

邑侯余公秀臣令攸獄訟不與百廢具舉公退之暇惟見鶴舞簾間而已因相治廢園種樹築臺結亭其上題曰醉墨邑人詠詩志盛光特蒙授簡援筆賦之其辭曰

異哉斯亭顏曰醉墨何官閣之風微同素士之題額豈子雲之思深抑永和之興逸招爽氣於停雲迎瑞靄於旭日攬勝而心跡雙清怡情而箏笛淨滌淥波漾兮倒影春陰酣兮作色疑喜雨而臨池仿會景以來卽夫其相形修築卽景盤桓廢園則一徑初闢方

塘而半畝猶寬度中爽而結構遂不日而改觀楹對展兮涵碧牕疊敞兮流丹露潤薔薇之架香生芍藥之欄絕塵氛於湫隘納清景於層巒諒舒肘之有助寧第容膝而爲安時則香銷書永衙散情遷天光四入晴采如旋浥靈峯之積翠噓文浦之輕烟日成兮霏霏簇錦心賞兮泫泫湧泉羌風流之藉甚信儒雅之超然於是松烟徐拂石湮欲流陳佳模兮曲水結異狀兮層樓金斗則團雲直上蒼龍則橫沼來遊墨花灑而蟾蜍夙飽墨瀟淋而翡翠思柔三色書成而貝光凝膩一波折去而庫露浮漚似坡公墨艷新發



仰米老墨戲勿休是宜收六朝於筆底而標九錫於  
離石之侯炳炳麟麟油油郁郁膏有餘馨汁無虛漉  
羨玻璃秋水時澄訝洞庭春色未足發長嘯於胡牀  
續高吟於霏玉授簡兮光搖卷幔濡毫兮聲傳刻燭  
鳴琴餘暇兮召杜雅懷染翰垂輝兮元白芳躅公乃  
閒倚曲檻俯睇江城敞虛簷而入畫拭棊几而神清  
望朱霞於天半佩蘭芷於平生契公權之心正慕文  
通之蜚英對景而吟桂樹潑墨而玩松聲傾方圭之  
瀝液灑激潤於飛觥催茲亭之聳峙合紀勝於觀成  
他日使君留手蹟永垂佳話於雕甍

洞庭賦

陳葵

涵萬象以澄澈兮鼓二氣之浩蕩澶滌漠以宵窈兮  
昭宇宙之軒曠希夷交其恍惚兮一氣神而奔放芳  
徽紛其未艾兮奄南征而蕩漾爾其扼黔粵之吭當  
梁雍之衝豁江漢之上游滌清濁之會同固已吐納  
三湘襟帶九江噴薄兮莫辨上下瀆漉兮不知西東  
故爾隘雲夢之浩瀟狹震澤之汪洋面衡嶽以爲屏  
枕桐栢而作障廓中區之大觀衛全楚之金湯同巨  
壑之幽洞不幻而樓之巧韻滄海之沄濶寧患潮汐  
之擾若夫良苗霽兮懷新億蕙滋其潢潦渥疇舒兮

應畚半壁挹其容保飭蠶筐兮八月漂白花於野島  
索舞簞兮季秋雜素質於芳草西北均利其蘊儲東  
南多藉以溫飽至如通商惠工帆檣若舳維海舶之  
不入雖蜀艦亦同棹瑰瑋汗漫譎詭續紛殊姿逸倫  
之族宮府廊廟之寶伯益之所弗知大禹之所弗考  
齊諧之所不名夷堅之所未道其足以陋山經而鄙  
物志者豈直龍鯉虎蛟螭蚌玉珎已哉當夫蓐收司  
令夷則應律氣耗蠹以沉毅景索莫而閨寂浸四極  
以俱浮蕩長空之一色天根爲之震撼地窟應其呼  
吸鑑入荒而無外昭寸心之清泚於是俯鏡澄浦仰  
濯元穹涵碧無極皓質竟空薰蕕俱化軌範無踪羣  
從莫逮流眄自雄渺渺兮身遊洪濛而獨立天地之  
中或乃聞雲舒卷風日交麗氛塵不到空色爭媚豈  
與世而浮沉隨流漸以涉濟知空明之可鏡羨清虛  
而不滯固包荒其善下爰容納而無旣爾乃酒酣耳  
熱逍遙間嬉拔玉珎而臨風發激楚之抗厲廣樂歇  
而不作兮新調美而誰媿刻羽鶻而流角兮降奎婁  
而歛秋氣望健翮之遐征兮凌九霄而展翅疑中道  
之無傍兮圖南溟而徑遂窺陟降而徵逐兮杳不知  
其所儼蓋其揚之不清滄之不渝浚定而神不瘁也

酌而不罄注而不溢靜深而外不累也與一世而無  
競兮寧招造物之忌也本廓達而無私兮雖懷襄而  
莫之甚也若乃落霞千陣燦兮若赤鱗騰躍於天際  
寒暉萬態爛兮若丹羽矯厲於域外月涵虛以晃漾  
兮蕩川嶽之精魄星散彩以輝映兮徹陰陽之元宅  
於是良夜方永墜露始結萬籟蕭寂千頃汨沒微聞  
皎潔疑天路之可通溯張槎之故轍竊廣寒之芳馥  
醉嫦娥之薌澤閭闔儼兮洞開靈樞揚兮昭晰爾乃  
希皇古之平滌弔景物之淹淪遡豪英之遺烈仰幽  
貞之餘清忠魂杳兮水雲深憐失路兮空營營英雄  
徂兮山川寂壁壘陳兮原野平其間登眺慷慨望古  
傷懷相與揚激商舒清角泝恬波紉杜若偃仰睥睨  
縱橫躑躅以咏歌其性情而發憤其所爲者諒未易  
以更僕若乃豐隆憑怒飛廉肆嗔窈窕黯黯洶洶澎  
澎不辨津涯但聞砰訇浮波屬天駭浪入冥鯤鯨出  
沒蛟龍憑陵追電之勇奚施折柱之暴焉懲還夜光  
兮何怯索文章兮有靈當此之時舟人震懼匍伏縱  
浪大化之中旋轉飄忽升降浮沉且不知夫造物者  
將使己爲鼃鼃爲蛙蠃又違記夫禱祀而求更生維



混沌之造設兮由拳鑿而不經天險不可扳而升兮  
地嶽巖其焉憑黃龍屹而負舟兮夫孰得而馴也參  
差吹兮何處望夫君兮獨熒熒偉神化之旁敷兮規  
樞極而覃聲靈豁遐荒之偏陂兮躋王道之蕩平海  
若恬而弭波兮崑源澄而永清維楚國之多材兮川  
嶽孕其靈奇柳學士之落拓兮憑寥廓而無歸誰默  
迺其先驅兮闕罔象而不疑婉彼美之我特兮洽千  
春而媚依圭符剖於上帝兮洞庭職而專司長風翼  
以吹噓兮鸞鳳騫而高飛排九閭而歷玉闕兮謁  
帝以陳詞內程已以鑑物兮邈極望而遐思焉  
以遊衍兮忽臨睨而傷懷也緬躡虛之芳躅兮憐彼  
美之有違也詠流波之雅引兮操屢變而不諧也曼  
慷慨而流觀兮河聲激而向西景運昌以重熙樂澄  
清之無涯

靈龜峯賦

陳 葵

鬱蒼岷之巖巖兮衍南條之靈皇肆三楚之巖巖兮  
更盤舒於液江瞻龜峯之峯嶽兮超岷峙於東方廻  
陽烏而弭羲轡兮上寥廓而下崢嶸爾其雙江合漪  
廻旋屈曲澎湃震蕩瀾縠滌觸或澄澈而無垠或湍  
激而相薄澹澹瀟瀟瀦瀦洞沆瀣澶澶乎千仞之麓昵

鴻翔鵠之倫躍鳧狎鷗之族雕琢刷蕩者蓋雜沓相  
屬焉白龜命龜應龍舞蛟栩栩潛伏者固非犀照之  
所得而矚也至若沆芷澧蘭湘藻衡蕙布蘓蟬聯紛  
藹葱蔚挹三春之雨露暢惠風之藻繪靄芬芳之可  
掬散異香於天際豈徒工其妍葩以競世俗之媵媚  
然而衡湘雲夢之間固多奇士激昂牢騷悲歌慷慨  
幽韻逸思沉鬱酣肆振衣千仞之岡躡足雲霄之上  
搔首而問青天浩歌以舒悲壯莫不習習洒洒峻嶷  
骯髒盼古今於須臾攬八荒於指掌振金玉之音發  
商徵之唱雲山象其勃窣清流寫其泱泱於是芳晨  
淑旦促席命觴攜王楊而侶班馬狎公子而昵王孫  
登東臯以長嘯泝清流而舒轅望層巘之翠嶺環孤  
峯而上騫憇短亭以遐矚俯浩汗之平原怪健翮之  
營拙逐燕雀以啾喧是時猶未造夫峯際也爾乃盤  
辟遶迴夷猶連蜷若挽若推而造乎其巔矧乎若神  
州之一氣遺世獨立渾象而忘筌於是躡雲梯升飛  
閣敞綺甌捲珠箔恍兮如虛超兮如寂飄飄乎幽思  
淪洞而不知其所適若乃前臨曠野曲阻長洲墳衍  
平沃臯隰閑幽華實並茂丹黃雜揉爛若披錦列繡  
而雕琢盈眸都背平岡翠屏雜列逶迤曼衍舒環縈

折廻顧城郭微聞嚙啣輕波縹渺佳樹葱鬱朦朧夸  
煙霧斷續而明滅至其層巒疊嶂橫披東南朝暉暮  
靄霽雪晴嵐春秋之變幻景物之錯參雖金閨蘭臺  
逞其心畧詞給墨花筆精未能確縷其二三於是笑  
語旣洽肝膽傾素逸興歡躍雕盤肆布玉几臨軒清  
醪在御金罍涌觴獻酬舛互歌稱爾汝狂態躍露動  
心驚耳交錯歡呼當此之時惟酒是務高山流水長  
懷鍾期之遇引商刻羽寧慮周瑜之願何當魯陽交  
揮夸父振杖廻曜靈而長駐於是天空氣徹風靄波  
恬澄江如練錦席輕懸望天路之高渺指關山之局

卷嘆冥鴻之旣逝候搏鵬之高騫雄心韜而愈熾壯  
志弭而益堅若乃清夜漏永皎月麗空山根削劃下  
臨無踪長松振柯蜿蜒乘風光華皎潔湛露斯濃舒  
嘯振稿帝座若通吸銀漢之清淺俯北杓之闌干察  
南溟於潛隱瞻顛氣於高寒慨憑弔之陳迹踐登臨  
之易殘緬風景之不殊悼人世之急湍懷好迷於天  
末兮悵離居之鮮歡邈前修之不吾俟兮耿懷緒之  
無端也至其靈巖幽壑澄潭豎澗奇葩異卉紫芝丹  
茜蓋莫非山川精英之所變見也麗隱於焉涉眺司  
空於焉遊憩吐故納新煉形易色之傳蓋往往而至

焉若其左引西江右接衡雲南望九嶷北枕洞庭固  
亦鳳觀虎視遐矚遠瞻之士吟咏刻鏤以供其窮搜  
而索冥也伊靈運之壯遊兮幽尋遍索夫瑋特愧蹇  
阨於聖世兮緇塵淹滯於南北遵瀚海而東浮兮經  
吳越而佇軼蹄百粵而遭迴兮交趾獵夫舊域笑交  
衢之萎植兮點染輒傲夫離奇憐幽谷之瑰瑋兮蒙  
茸見嗤於蕪菱大化廓無私庇兮賜鱗羽之左池矧  
白涅之莫據兮信浮沉其若茲緬龜峯之毓靈兮獨  
挺峙而聳擢巖競秀而壑爭流兮流眄極而舒駭矚  
產荒陬之僻隅兮甘湛寂而媚幽獨惟川觀而巖居  
兮陟降憑以品目幽隱韜而不彰兮莽榛亦覺其黯  
漠諒屈伸之有候兮杓之人又焉能覺浯溪蘊於荒  
煙兮假次山而悠揚赤壁淪於衰草兮藉子瞻而偃  
強矧風景之殊尤兮非鬪麗而侈張自總髮而嬉傲  
兮類故交之難忘神儀洽而婉約兮權概陳而發皇  
學士資以賡歌兮金匱褒夫琳瑯華有踵而美有續  
兮妙譽延於八方山靈庶以競勸兮葆精英而流光  
頌曰吳有靈巖越有靈石毓精效順標光簡籍茲爾  
孤高嘉命寵褒祥雲甘雨伊職其勞勿產金玉以雕  
素樸勿藏精魘駭人心目肖形襲踪命龜協庸勿鄰



傲世曳尾塗中爾卜爾筮休徵協從顧名思義永靜  
斯峯

寶塘紅白蓮花賦

吳雲際

聿朱明之布令欣赤帝之當陽周覽邇迴弭蓋寶塘  
觀山川兮佳麗悅草木兮丰昌忽天葩之燦爛散碧  
波之奇香色斑駁以平鋪兮儼玉霏而霞光惟主人  
之愛客叩桂權而相羊俯清鏡之漣漪兮睇田田而  
舒嘯森素榮而委練兮爛朱華若庭燎恍望舒之初  
升兮變夕陽而返照錯繁星以倒影兮擬龍宮而浴  
曜質雜還以成錦兮繪更僕而呈貌爾乃清風搖曳

芳姿逶迤舉艷冶之修幹弄婉婉之輕柯訪清溪之  
弱植拂縞素於苧蘿乍婉轉以瞭曼兮訝白皙而頰  
酡登蓬山以飲瓊膏兮過湘水而拖銀波儼洛浦之  
颺袖兮想神濟之芳躅忽雲霞掩映於修渚兮赤松  
欣解夫煩溽於是融風未已甘澍平渥洒花塢而週  
遭涵鄭渠之屈曲碧盤捧珠金房吐綠拭京兆之霜  
劍映漢宮之紅玉巨擘濯漪於明月童子揮汗乎赤  
屋羗火藻以耀彩倏澹素而自足宛桃李之繽紛何  
穠纖之簪簇爾乃豐隆卷施飛廉安節羲御夷猶陽  
烏振翮於是鼓輕柂窮水湄窺丹穴捫玉卮有如宓

妃採珠於滄瀨帝子拾翠於芳涯或單幹而駢花恍  
參差而異姿差肖夫額檐之瑞寧讓乎天泉之池嗟  
夫楚澤之中蓮惟一色盈盈幽壑亦白亦赤輝映點  
綴巧非人力天種靈根地結元實想披荆之艱難飢  
先疇之舊德莫教朱顏之易老母使皓首之相催頻  
開頻合自裁自培抱潔清而共賞播芳馨於將來洽  
瑤池之玉液葆仙胎於靈臺

登西閣賦

譚兆發

余情樂夫嬉翺兮冀聞風使奔屬徑不周以迴眄兮  
竚東海而遐矚西閣峙其穹窿兮登臨駭而縱目地  
盤結而崆嶽兮山靈萃而清淑帶兩江之激湍兮砥  
中流之巨舳淵澄涵而齋瀆兮峯層峻而高矗攬龜  
峯之織翠兮指衡嶽其左軸披吳會之風景兮雲物  
窈其可掬貽吟龍於文浦兮睇翔鶴於斑竹騰天馬  
而上浮兮鼓黃甲之錦簇揭芙蓉以作帳兮黻羅星  
之藻煜瑞猊出而率舞兮文闕肇而拱祿鸞鳳對而  
帝悅兮虹橋續而君錄揖朝真以登仙兮跨紫麟與  
白鹿步赤松之清塵兮嘯明月其隱伏憶司空之温  
泉兮飲劉郎以獲福任趨舍之各殊兮悉芳徽之可  
躡惟競美於河陽兮梅城尙蘊夫真璞絃誦洽而風

風兮荃蕙樹而郁郁緬媿修以全真兮老將至而形  
穆聊逍遙以超氛兮精長存而氣馥感吾生之行休  
兮幸高賢之止宿攀幽蘭以結芳兮解佩纓以爲服  
傾匏樽以相屬兮盡陶巾之所漉弄柯亭於江渚兮  
撒君山之五六極娛遊以忘歸兮捲暮雲之紛逐景  
斜暉其返照兮煙拖露而橫陸漁歌沉而晚棹兮牧  
童和而驅犢鳥飛回其遶樹兮魚戲藻以遊澳妙萬  
物之各適兮樂大化之涵育頃焉月出東方兮清風  
徐來於林麓惟莊叟之天籟兮媚遺響於空谷

詩五古

元

題鈕處士隱居

馮子振

太湖光爛銀日上絢朝彩幽人住此中浩蕩增巋嵬亦有  
千林橘柯葉霜不改仙翁留丹竈五色精璀璨我欲從之  
遊芝田爲君采

遊報恩寺讀東坡石刻

老石經劫壞神物在處留元豐蕪長公有唱當須酬莫作  
分別想滄海粟影浮人生宇宙間何許更九州文字千古  
映醉墨楷法適願杳五百年華屋真山邱且從菊子訓銅

秋三千秋

明

題張經歷德洪山水圖二首

彭友信

樓上看山色磯頭泊釣舟江南景多似此地記曾遊  
青山橫幽谷流水遶茅屋分明舊隱居只少數竿竹

贈彭民望三首

李東陽 茶陵

莊子作詩苦飢腸無停迴胸中錦繡字字不輕裁君詩  
驚滿座氣與滄溟開酒酣疾伸紙下筆無嫌猜莊子壯君  
志君亦愛其才我居二子間形穢不自哀願從雙飛翼聊  
與相徘徊

我屋雖蕭條欣然與子居嘉辰與永久觴詠得相俱而胡  
好出遊十日九跨驢明月照萬里停雲在庭除入門坐我  
床探我囊中書讀之莞爾笑謂我興有餘我詩世不好見  
者擲道隅君情倘相契贈比雙明珠

我家水西涯性本愛幽僻與君數攜手興至忘所適溪行  
緣縈紆野酌散愁寂倦來依樹坐舉目見山色山色忽已  
改離別復幾載移居在城南咫尺隔江海夜來春風至芳  
意思共採道逢舊鄰人茅屋復何在

再贈三首用前韻

吾愛李太白金鑿供奉迴釣船坐明月宮錦賜新裁騎鯨



忽不見懷抱向誰開舉杯問青天恐被浮雲猜明月千載  
恨謫仙千古才古風坐掃地此事亦堪哀我非能詩者君  
意莫徘徊

吾憐賈浪仙寂寂長安居藜羹與糲飯婢僕日相俱出門  
寡儔侶獨跨短尾驢年年祭詩卷忽忽歲仍除濁醪不過  
墻故人但空書梁肉者誰子斯人食無餘古來風流士棄  
置天一隅荆山有抱玉滄海有明珠

吾憐孟東野詩思老愈僻一吟雙眉皺見者意不適偶逢  
韓昌黎傾倒慰孤寂君才不須猜而我有愧色我詩調屢  
改清苦近一載君詩十年前散落滿湖海永懷風雨夕聯

句意可採三復鬪雞篇斯人今安在

積雨酬西涯

彭澤

雨聲長夜鳴曉起水在屋豈謂六月中淒涼變炎溽街衢  
渺長河波浪走湍瀆我時攬衣裳倉皇如老僕短髮亂垂  
肩濁泥深沒足閒門坐蕭條何異在山谷平生愛疎散老  
大耻局促勿枉太白詩清風在修竹誦之不忍置日暮繼  
明燭

答李西涯

長安重交遊車馬相縈迴義氣干白日綈袍雲錦裁揚雄  
雖識字見人口不開終日飲美酒窮達不自猜舉世盡如

醉誰復憐其才嗤彼失路人臨歧悲且哀感君瓊瑤篇讀之令徘徊

登合江亭用韓文公韻

易舒誥

壁書始傳伏麟經復明左羣聖留述作萬世聆咳唾此道既裁成斯民賴佑佐善舞在長袖良賈貴多貨積書喜充棟涉獵曾一過昌黎載道文萬物筆端挫崇正黜邪說當時誰敢和免死賜放謫承恩拜左个潮水多毒淫陽山最坎壈雲嶺鳥不度雪關馬頻卧視難如甘醴吟弄白日課臣于期勿負忠蓋更無那紛紛悲有位無乃貪且懦子厚方赴柳劉公亦入播臬翔九霄濶蟬清終歲饑覽古合江詩爲我山川贊先哲經行地千載能起惰樹影搖春杯波光盪詩座此生若烟浮百事如甌破灑然天風上下視塵土澹

經仙人橋

鄒守益 安福

假道獻花巖周覽仙人橋六丁揮霹靂羣虹駕岩堯老松垂長影鼻動若相招怪石堆丹篆靈澗瀉雲韶年來歷名嶽世味漸能銷猶有一瓢水欲濟同室熯才力不逮志恐爲世所囂終當結草廬赤脚踏瓊瑤

靈龜峯春望

費思居 荆門

危峯俯江臯江嶠峯根路飛閣干雲立空翠來無數勝地

帶郭偏遊人易坦步香暖菜花齊沙行柳陰暮狎鷗輕自  
喜啼鶯切何訴望遠使情多春心各有故

皇清

崔五竺索遊南嶽詩時予方守制家食

劉友光

微霜吹頰髮團團草上白鴈自明月來苦寒生翰翮抱書  
開五雲略與說肝膈青草涵巾紫雲壽相絡繹芙蓉九千  
丈南來已殊碧白袷青芒屨嵐煙道充斥望君白玉虬洒  
酒祝融眷海日盪襟期星辰隨手摘神鷹自高鶩鷗鷺殊  
不惜蒿艾苦凶鸞偃蹇不越陌陋哉漢武皇雄心終跼蹐  
大牢徒霍滿南巡氣蕭瑟獨有謝靈運持斧縱雙屐此意  
差強人苦爲官屬阨濟勝爾同情縹渺餐玉液漁獵到蚶  
蚪桃花蒙潤澤開門望籬菊何能忘三益

同歐陽晉侯登龍潭馬鞍山

馬世俊

溧陽

我出千重巖來登千頃石盪胸吳地濶遙睇楚天碧濕雲  
開晚照隔岼山盡赤漁網集斷浦鳥道盤絕壁明流淨如  
鏡呼朋掛遠席洲草雨濛濛嶺葉風撼撼俯仰興有餘息  
心謝物役

從丁中丞如嶽麓書院賦呈

陳之騷

天地有英華山靈鍾獨私衡嶽奠南服峰巒紛翠馳當其

落往神人若鞭之分疏出大荒州邑領一支斷續三百  
里乃到長沙陞郡城西矗起餘勢送水湄下有蛟龍盤上  
冠禹王碑雲霞覆異色晴陰映城墀古之有道者所以愛  
棲遲登眺豁心目鄙吝不留絲坐嘯長松下息機涵天姿  
虛融觀太極惺惺未發時應接了無礙四箴加護持吾道  
豈能寂猗蘭寄所思所思來何湊意氣無參差清談非莊  
老微言喻獨知名賢不世出風流屬在茲中丞列畫戟清  
標出鳳池稽古搜盛蹟烟榛辟荒祠芳草臨流渡從鷗踏  
山芝簪纓陪講席子衿側賦詩度量優名理文章醇醇詞  
只今四海宴

聖作有威儀

詔下修文德大臣盡師師可但儒生貴山川喜榮施

韓元墓

弁序

韓元墓在府治北階下新守者必祀或疑元應罪而誅  
豈在祀典况衎爲藏骨官爲守塚予應之曰彼特失於  
見義不精識人不蚤此春秋責備賢者元豈得已者哉  
後世有國者並存此一坏土教人臣守禦當死生以之  
予讀焉韞曰予委質於狄之鼓未委於晉之鼓中行穆  
子無得而辭焉當曹操託名漢相則凡與曹爭者與漢  
爭也背曹者卽背漢也元旣受命漢相則長沙固漢郡

耳守土之任固其所也况先主因董承泄機連名而逃未嘗親受討賊之詔元安得以長沙予之到此祇因用武無地聊爲掠奪之計心知元無罪非同賊臣抗順所以容其官禮成葬卽葬於朝署之後無嫌

漢家王氣盡爲誰守巖城阿瞞託漢相猶挾天子名所以荀文若初見不勝情帝號幾曾改天下非縱橫雖是中山後太守豈私迎曹劉俱客閭長沙自浮萍人人託扶鼎皇路乃夷庚樓堞觀城日惱殺角弓鳴老將甘受戮穿楊故貫纓匹夫何爲者血劍逞不平幕府來先主軍禮修孔明憐伊賁溝壑狐邱封土成退步得尺寸畫地分死生宿草年年長華磚齒箇縈幾能作墓鬼猶聆鈴閣聲至今二千石拜掃非不榮

雪中玩月

陳治行

月來曾幾時雪已深三尺雪影蕩空林與月加精魄月所未到處雪光自映徹雪月互交加是二還是一空中發雙耀上下兩奇絕碧落瓊瑤帳水晶琉璃國海市與蜃樓縱幻無此色

雜詩

陳治卓

伯勞未生羽老鶴凌霄舞伯勞學人言老鶴聲聞天一言主曰善衆客交稱羨鶴在池邊立主人如未見



春日步石橋野興集杜

易生龍

野興每難盡脫身事幽討春日佳氣多陰陽割昏曉晚起  
索誰親肯來等一老携錢過野橋世路成奔峭紛紛桃李  
枝無名江上草吟多意有餘所歷厭機巧真脆各有終稱  
心固爲好橋斷却尋蹊吏人橋外少時清猶茹芝吾慕漢  
初老十觴亦不醉爾輩堪一笑歲寒守舊柯白雲自高妙  
詠懷  
劉兆雍

平生無所好所好在真友肝膽可相傾風雨可相守芥蒂  
兩俱忘雲夢吞八九山水探幽光秘笈發二酉古來素心  
人相與期不朽

吳介石明府解官回都門

劉世坡

冉冉山上蘭離離山下棘天風矯鸞翔去住無難色留滯  
越十年中道常棲息貽我尺素書駕言返舊國書中亦何  
云感別增悽惻三復苦沉吟添我長相憶

相憶在何所徘徊古城曲冰雪被隄岸湘波寒且淥是時  
歲云暮河岸橫原陸風悽蒲柳疎霜嚴梨栗熟行人懷去  
路野鳥競獨宿與子結交深無由相追逐

追逐亦有時高懷良浩浩清讌集華池白日延清灑當其  
適意時嵇呂未云好爲郎豈不榮而獨敦古道古道世多  
輕陽城註下考美名非所慕摛思麗文藻湘岸搴杜蘅曾

不撓懷抱雲霄有遐路致身須及早畏途饒蕪黎哲人慎  
自保

自保良不易行路良亦難風波梗長途尺澤有狂瀾與子  
別離情躑躅應寡歡豈無同心人中懷惟所安抱壁莫向  
楚當門忌種蘭誰爲種蘭者蒿日起長歎

白蓮山齋詠懷

廖夢熊

澹坐一室中坦然若忘事豈不貴經營嗟哉做神志造化  
類陶冶百端任所置秋風飄白楊秋色同憔悴淡泊以養  
真神尊形亦治極目送流雲超然廓胸次

大江東去曲

王純錫

大江東去浪滔滔無今古今古莫能迴人生不常聚蒼梧  
晝亦雲湘江春多雨翠華去不歸瑤瑟哀難撫蘭蕙日青  
青千秋無人主獨有李翰林解道遠離苦

春夜同盤谷遊嶽麓

東風吹杜蘅向夕清香生扁舟泛綠水愛此山色晴相顧  
命登涉筋骨颯然輕是時春遶半夾路燦繁英幽意紛延  
屬仰見初月明解衣掃危石坐聽大江聲泠泠無塵響我  
心有餘清往來觀衆妙動與天機迎何時緱嶺上騎鶴弄  
瑤笙

寄候廬陵黃通登夫子

劉其煒

千古文章伯廬陵稱六一流風振西江夫子繼彩筆遴選  
越湖南湘錦裁玉尺謬荷薦麟經菲材愧賞識仰瞻儀似  
玉佩訓情尤切析理辨毫芒憐才饑渴迫質慚非李桃何  
當化雨溢方期奉清塵無端促別急風掛一帆飛離情兩  
鬱結歸來梅花城夢想思立雪屢欲策霜蹄行行幾復輟  
聊復藉雙鯉先此布悃悃約看長安花快晤金臺側願言  
摩健翎追隨翔鳳闕

上座師陳可齋夫子

余潮

威鳳鳴高岡羽儀世所愛見之各有時未易假文采夫子  
應昌期賀世驚海內經術契

宸衷鴻詞冠廷對以茲天下才玉魚欣早佩華要官屢遷  
南邦熙

帝載旋晉冢宰秩和羹調鼎鼎間氣豈偶然元會實有在  
何幸東閣開菲與葑下逮作霖大澤流長此仰汪濊

曉登香山

洪特書

星月欲初曙嵐氣尚濛濛征夫促曉裝駕言奚所從徒倚  
值朝暎如花隱霧中羲和鞭御急豁然遠翳空清絕彌覺  
高幽極愈難窮隨山將萬轉未敢息微躬終焉踰絕頂不  
覺盪心胸揮手弄白日舉頭摩蒼穹平生志凌雲於此愜  
素衷俯視羣鳥翔奮翮何能翀自是境地殊非關羽未豐



却顧所來徑雲海碧重重坐久清香生縹緲來遠風

天蓬巖訪蔡槐庭太僕讀書故址

賀瓊珠

偶尋招提境苔深沒展齒齋鼓罷經堂滿堂木居士栗主  
祀同卿習靜昔居此山僧談典故足補前朝史卓哉古人  
風海內四君子老作向禽遊默叅南北旨至今巖壁間中  
夜梵聲起殘帙走蠹魚徘徊增仰止策杖過前峯峰峰暮  
烟紫

遊司空山

絕嶂千餘尋微雲滅山脚草木鬱葱龍隱隱秀巖壑複澗  
水潺湲遙岑八寂寞攀藤陟層巔日色遙耀錯凝睇望翠  
微中有長年蕊采采不盈筐曲逕一花落好風東南來四  
山喧鳥雀但聞松頂濤不見松間鶴悵然思神仙何處覓  
蘭若

杜溪八景

存六

陳述遵

愛此杜溪水西流清澈底山環氣鬱盤邨舒勢邈迤南瞻

烟樹濛西顧風景靡獨有東崖人池上鳳毛起

杜溪

開門對大瀛振衣回望杳英靈藉高會近野巖物盪昏曉

崩勢十里來屈曲霾雲表祈雨指仙壇探奇得竊妙

太瀛山

百畝爛田塘古井沉烟靄何年石爨新精爛清無對永聚

水晶光了無砂石礫誰云甘先竭混混原泉會

甘泉井

前有鉄地坊坊前蛟池躍風雨漫不飛鹿豕或同宿當時  
雷怒號頃刻石翻覆至今土山焦猶存水一勺

躍蛟池

西江印心石傳聞自古昔每逢稽天濤渾與厚地裂豈有  
無底潭蛟龍此窟宅神物多瑰奇杳冥不可識

印心石

天上施鬼斧古蹟鑿神像仙室藏洞中鐘聲殷泉上更有  
曲通處嵌竇阻眺望乾坤廻互理茫渺誰能狀

甘棠岩

### 深谷早行

陳述祥

繁霜覆平林曙色動寒谷策馬渡溪水晨風一何肅驚魚  
翻渚蘋駭獸響嵯竹我行非不早殘星猶歷碌誰知深谷  
中田家炊已熟

### 靈龜峰

陳其璫

危峰何亭亭江水自悠悠江上無今昔人生寄蜉蝣春來  
春復去黃花滿前邱古人不可作來者邈難求兩三素心  
人相攜足討幽一樽聊與醉醉共短長謳借問蘭亭會何  
如舞雩遊

### 妙香閣

陳兆星

悟後知花夢妙香本幽獨豈以物外心取娛羣耳目衆卉  
拂楹前隨風散林薄瞻者或失之徒羨香盈掬花香時有  
聞斯香無斷續花香何始聞斯聞無庸觸誠能空色香妙  
妙始自覺

黃甲洲

陳夢元

隔江橫坦夷水面環爲洲黃甲舊得名沿襲難窮接清澄  
攸谿抱愛此澹油油沙淺平於掌深草迎春柔樹老枯枝  
存山翠黃昏收西閣對日出鐘曉聲隨流夜半蕩魚艇月  
凝涼露秋誰其闢講堂築之邑中侯誦書兼鳴經小魯由  
居鄒虛懷禮爲羅良材千章蒐非供閒嘯咏多識勤校讎  
摩挲躍水鼎惋惜礪角牛懷古動寥濶獲野殫咨諏蘭杜  
薄言采芙蓉風脩脩芬芳元楚澤波瀾迴方舟攬勝劇幽  
興費時撫雕鏤

湘中行

清深古湘州焉蒲石見底陽朔窮其源百折經下雋中有  
衡嶽峰芙蓉仙衣被挂席長風隨九面非耶是旋泉不可  
測北逕潭之委我居陰山麓攸谿亦附爾容漾西北入助  
流盈瀾瀾年華舟車度涉江桑經揣迴眸在洞庭恂悅天  
際視照始五六尺迴瀾五百里從來傳瀟湘幽思精騷理  
崎嶇挺險秀抑揚怨宮徵懷人疑宛在豈徒昔聞水浩歌  
湘中曲紆軫予望跂

湘陰舟次謁汪毛兩座師別後感賦

余澣

雲波湖堤帶烟林澹蕩青餘寒逼蓬牖亮音孰與聽年時

十五上渺意窮滄溟趁彼飛疾艇泛我芒寒星凜抑奉慈  
戒歡唱逾洞庭南風萬里勁飽颿未肯停歌呼崔與李振  
袖倚危樞行破漢江浪黃河揚其清悠然達  
帝里匹馬快流霆緬懷當年夢于今乃獨惺寧知造物意  
使我不爲萍多感知已厚長嘯返柴荆

小塢山

凌晨越溪澗杖策遵幽徼野日破烟霏心閒展遊眺稍窮  
林薄紆遂歷岡陵峭千巖如蹲鴟突兀藏靈奧絕頂亦堂  
皇古構存遺廟峰回翠竹團井汲得泉竅士女雜還來筍  
輿前後導悠哉禮佛心徒共僧徒笑是時秋已深夾路丹

旆耀梯徑藤<sub>其</sub>牽飛空雲霧倒四望青濛濛石濤隱相照  
愧異伯仁遊良慰康樂好想見開闢初矯首發長嘯憑吊  
多古意歷攬收衆妙延賞坐忘歸願言偕同調盡緝薜蘿  
裳來卧芙蓉嶠寥寥千載跡石徑幾人掃

嘉慶辛酉冬與孫廣文衡臯鄧廣文稼軒陶縣尹季壽陪  
秦小峴廉使遊嶽麓題名李北海碑陰 陳圭

雨洗湘天明城頭射朝旭西山過江來黛色新如沃廉使  
方夙興平亭畢訟牘乘閒偶出遊命侶例不速尋山訪古  
碣適穿問民俗時惟子月初一陽自剝復乃知天地心春  
臺如轉轂出城屏騶從入舟展心曲拂霄看鳥飛在藻知



魚樂愛此滑笏流輟棹始登陸肩乘僕夫輿身著山人服  
經邱松響寒過澗梅英馥無風峽轉清有鶴泉飛瀑書聲  
隔重雲樵唱出深谷霜葉渲林紅炊烟覆村綠一僧蘿逕  
來相迎意敦篤幽寂十笏房颯爽千竿竹舊題籠碧紗午  
齋設茗粥導引徧諸勝衲衣風穆穆歲稔萬物腴山空百  
靈肅撫景娛詠情卽事豁衆目摩抄北海碑剔蘚難快讀  
蛟螭紛相拏劍戟森在握平生剛直節觀此亦已足去年  
空解纜舟船促今此得從公題名勒蒼玉吾儕三四人驥  
尾相連屬因之歎前賢鐫華半瘵剝或難窮歲年或已闕  
氏族幾人首尾完最著米海岳昔爲元豐初今乃嘉慶六  
時清庶事康天文麗星宿火維鶉鳥精綿亘茲山麓長沙  
古都會東望堞雉簇蒼蒼十萬家暝色錯裊禱風流白雲  
司騷雅辦香祝旣留雪鴻跡合補金石錄誰爲後來人千  
春躡芳躅

紫陽山僧房題壁

古刹摩蒼穹浮雲起幢蓋稜稜石磴高鬱鬱松陰靄我從  
六塵來寶殿參三昧不知繡佛心真否慈悲大亭午一聲  
鐘天空靜百籟鼻端聞妙香胸中絕纖芥老僧亦無言送  
我出花外何以鎮山門留詩代玉帶

宿龔家橋

文自奎

真色隘平原崎嶇揣綫路茅店前村中隱隱隔烟霧輿夫  
勞可念旅次怯再誤感促投遠燈欵扉息煩慮主人利多  
客倚門止行屨小室充囊橐庭隅曠一步方言雜詭浪然  
坐兩無預仙人恍惚來揮塵雲中遇嗒然遺形骸一縷清  
幽趣屠門對淨几曾寫黃庭句不經風濤變靜功敢云固  
學道幸有年於焉證吾素

藝花

文自炳

城邊賣花翁藝花及春早春深花未開灌花翁懊惱萬卉  
各有時心急晴不好孳孳新意發斯妙我當討

司空山懷古

陳長敬

衆山鬱蒼蒼回互勢峻峭紫氣正東來崇邱異孤嶠縹緲  
局重巖白日烟雲繞三十有六峯神秀乃天造石乳下玲  
瓏丹篆隱隈隩松杉自輪囷藤蘿遞覆冒香澗水琤琮宮  
商舍古調幾片雲中花流向溫泉漂緬昔驂鸞虬法輪任  
騰越三島與十洲指顧塵垢掃迢迢千載下金碧仍涵照  
鳥啄認舊池鶴飛向古廟翹首真武岡玉露激晴曜寤寐  
倘一逢心印領其要白馬溪外溪雲螭絕塵到樵叟漫說  
仙太素真人號福廕亘攸輿甘雨和風尙飄颻望九垓仙  
忠表名教古寺綠苔侵蕭蕭南齊貌徑欲扣瓊鐘解衣一

長嘯

詩七古

宋

太白仙人下岷峩話

王夢應

太白仙人下岷峩飛凌素烟紫瓊珂天風萬里吹銀河手  
接瑤草光逶迤琅琅大清綠雲歌下弄倒影笑羲娥錦袍  
淋漓金叵羅醉圍嬋娟玉顏酡金庭昔日乘鸞過不肯上  
天著朝靴下界弱水飛塵多公為星精辟兵戈顧見瀛海  
秋澄波綠鬢灑灑吞天和後天不老公所哦

元

贈鐵脚劉道人

馮子振

道人鐵腳更鐵冠山人鐵面仍鐵肝道人山人兩相值面  
色脚色俱蒼寒道人鋒稜厓骨削山人劍氣星斗干山空  
人去夜猿別一葦北渡黃河乾蘆溝月濕波蕩滂太行雲  
晶峰巘岬古來豪傑數燕代長轂驥裹榴花鞍呼鷹射雁  
逐雞狗脫手拓彈排金丸壁門雙闕照燕碣虎豹蹲踞蛟  
龍蟠布衣一語動萬乘不識宰相爲何官雲飛風起對紫  
壇血指瀝漉哀如丹尙方百奉諂骨裂山人九死聖度寬  
萬里放還真墮甌回視歲月驚流湍南山清渭一夢覺但  
見落葉吹長安道人槌札未棄置欲刻朽骨爲榮觀野麋  
豈是麟閣具滄海自分終魚竿窮林穴鷄無處著豈意思

想南溟搏人間新貴奪統綺曲眉婉變浮山巒爲渠向作  
白玉盤眼耳鼻舌渾熟瞞劉郎他日高眼看歸來取鉢歌  
馮驩

題趙承旨白鼻騮圖

弁序

松雪趙承旨用生紙畫人馬圖居然生動之態使龍眠  
無恙當與並驅也因賦一詩時泰定二年七月二十二  
日書於維揚寓室

曲江洗刷墨

一作雲

滿身雄姿逸態何超羣  
眼中但覺肉勝

骨幹也合讓曹將軍  
嗟哉今人畫唐馬  
精藝亦出曹唐下  
玉堂學士重名譽  
一紙千金不當價  
山牕擁雪觀畫圖  
據



鞍便欲擒於菟天驥真龍有時有杜老歌行一作詩篇絕代無

此詩一作察伋見趙承旨蕃馬圖卷一作郭界見了堂弟子林上人天錫遺詩卷

明

宋丞相文文山三月三日獄中遺墨 彭友信

崖山雲寒海舟覆六載孤臣老幽獄東風啼鳩三月三五  
陵望斷春蕪綠墨花煌煌五十六寫出江南愁萬斛當時  
下筆眼如虎日落天低鬼神哭長帆昔挂秦淮船手持一  
往擎南天閭闔嶺海血灑檝回首家國隨飛烟六宮粉黛  
黃沙裏漢水無光吹不起全軀肯學褚淵生嚼舌甘爲臬  
卿死蘇門愁望草萋萋高官不換西山嶽哀吟一幅肝腸  
裂勁氣萬丈蛟龍飛九京恨殺葛嶺賊恨不剗心飲其血  
堂堂忠節盖宇宙白日青天照遺墨落花上已風雨時展  
轉如對熊虎姿再拜酌公金屈卮有口不讀蘭亭詩

贈同庚廖紫麟

西風吹起神仙宅七十二峯無顏色山神鍾秀八百年紫  
麟再降蓬萊客竹杖撥開衡嶽雲芒鞋踏破君山雪歸來  
遁跡南陽巔望斷清香占秋月去年曾同葉縣令雙鳧飛  
下南來鳥天台道士挽不留江草江花摠相識春風一笑  
訪錢鏗記取當年同降謫君駕紫麟我駕虬再借塵寰住

八百

送客

彭澤

東風城南吹酒香門前楊柳深覆牆遊絲十丈輕飄泊羣  
花漠漠白日光呼童沽酒歸送客客苦離別懶舉觴此時  
對酒須共醉明日相思空斷腸

贈龍以昭隱居

王守仁 餘姚

長沙有翁號願真鄉人共稱避世士自言太初之後嗣早  
歲工文頗求仕中年忽慕伯夷風脫棄功名如敝屣似翁  
含章良可貞或從王事應有子

黃鶴樓和李西涯韻

易舒誥

飛樓欲仄驚濤泊海內高才慕黃鶴洞庭溟渤自透迤淡  
雲薄霧驅寥廓悠悠魚鳥雜浮沉滾滾川巒互聯絡千里  
相思共采蘭萬古興亡一澗閣九華五老開吳峰漢水方  
山帶楚宮形勢由來天設險南關北塞樹烟通襄樊宛洛  
赴中土夏口荊州接上風勇畧曾聞赤壁士雄謀還憶紫  
髯翁鳳山先生百代彥常抱憂時坐夜半臨高樓惻動長  
吟非是詞人弄柔翰浩瀚聆公座上言疇昔慚吾管中見  
秋氣偏能清客心春風更覺吹人面指掌輸贏披漢圖墮  
淚蒼黃悲墨練君王側席早徵求願令文化回江漢

劉杜三南還過訪

郭都賢 益陽

梅花五月何遷次雪滿江城驚夕吹剡谿一棹聞造門倒

衣直走河干跂坐君十尺對短檠四壁菰蘆撐襍被別來  
無恙外何言醒中如述夢中事曾逢天寶幾遺民得訊開  
元舊遊地新蒲細柳祇吞聲擊筑碎琴誰破滄出門大笑  
閉門心落魄歸來聊遣意洞庭風浪無停時青雀飛飛且  
維繫平原十日喜淹留太史周南豈同滯君歸猿鶴我沙  
蟲在水在山同憔悴

漢江逢秋

胡湛

或從漢江來或從漢江去漢水自廣永秋思落何處欲尋  
秋去與秋來還從晴川黃鶴住

皇清

望嶽麓

時書院新復

陳之騷

南嶽此去三百里勢盡岫嶺阻湘水雖然地脉各斷流遙  
望祝融一麓耳平地得山如樓臺纔有突兀卽奇矣矧乃  
矗出郡河西旗張盾立如壯士陰雨無根忽生雲晴明鬱  
翠滿城市想昔瀕洞九載時濛沙之勢浸滅趾黃雄精子  
夜投宿留得奇字驚人起山鬼裸體呼隊行猛獸或搏蹲  
且止當時烈火豈盡焚大壑幽叢歷古是韓子索碑歸獨  
來痛哭茫茫無人指却怪北海去幾時何緣並沒道林寺  
初信廢興自有期草木豈能欺杖屨朱張誰謂不風流共  
載仙舟爭郭李公子雅量客思清遠塵相將采蘭芷登高

縱目私悒消坐息幽深談名理山椒更有翠微堂回看陸  
洲厚一紙風雨晤歌是何年山窻鬼嘯夜燈死老僧燈火  
問有無粉蠹窮壁餓經史吾道千載豈寂寥山靈面目如  
閨媵誰堪深鎖不嫁人聞鐘明粧爲君子多情懷昔周司  
空披尋勝蹟攘葛藟大桷修椽揮月斤升堂入室引珠履  
九曲清泉入檻池芙蓉香遍讀書几山形罄折如箕踞環  
抱一色老鮮紫就中絃誦杳不聞隔江遙望蒼鬱已江心  
掩映泛危樓亂歲撤去爲壁壘獨餘崎嶇非戰場聖賢道  
貌尙未毀昆明戰罷漢功收詞臣作鎮典則美等閒校士  
如校旗定價收聲卽在此長風一動波瀾催書生去家身

輕徙願學古之辟穀人長徃山中餐書髓墨光浮動五色  
雲濤牋越過十幅綺夜發簡練英雄然天真要在休閒裏  
新知豈傍兒聞生摧陷方令精神喜禪寂多應此法同登  
臨好事良有以我愛秋峯未成遊日暮舒眺凭城齒

壽節母胡門蕭氏

湖南學政 阮學浩 山陽

碑兀松嶺石孤岸夜壑風濤廻紫瀾下視蒿艾弄毛衣仰  
看衡嶽星一舉只有母青春調琴瑟中年藁砧忽長歎膝下  
雙珠荻畫寒吹映保斗天根盥楚材搜剔露節角菘林褒  
然軍能冠使者冰雪爲琢鏤而子力倔出排幹閎深雋美  
治經術宣揚闡教敢荒漫絡秀夫人足差池宣文授書聲

隔幔慧性徹首古所難鬚眉巾幘憑判斷繡佛登仙總渺  
茫幼躬燾後纜壯觀金門客喜卜機雲板輿南迓  
宸褒煥司空嶂上彩霞鮮笄珈日旭山河空芸壇須豎鐵  
脊染莫使跼跼塵纓絆勉旃昆季報慈護尋常酌兕直河  
漢十二闌干棒燭高字寫湘嵐霏錦段詩成響欲遏朱陵  
祀以海籌天無算

紅拂墓

王純鎔

隋鹿蹊蹊在平陸羣雄盡向草間伏楊公不辨長揖人貴  
人眼大空多肉帳前美女秋水明夜半潛行從豪英草澤  
英雄未虎嘯徘徊六合無知名風雲之感先巾幘萬古使  
人潛動魄我來潞水駐行騎遠弔遺魂拂蘿石春山淡拖  
春光灑長嘯一聲天地白

弔賈長沙

鵬賦空傳宅已荒還將賦意問瀟湘自謂壽命不久長何  
地復置長沙王卿雲旦後日再中哭向漢廷亦匆匆絳灌  
亦有濟時功我之大賢誰不容莫言夜半虛前席如此君  
恩豈易得君不見屈原一斥無還日美人日暮情何極

墨沙潭

劉林青

山山攢簇路盤折澗流淙淙寒徹骨無端怪石欲攬人脚  
底磷磷如冰滑風颼颼兮雨濛濛鴉叫狝啼神恍惚何來



鸞鳳歛高翥海南龍湫四字突斜倒銀河勢奔雷沉潭不  
動古鐵色潭底老龍多變化虬髯白叟倚蒼壁懸巖栩栩  
兩翼飛不知是蝶是魂魄

愚溪謁柳司馬祠

賀對颺

少陵不作青蓮死羅池老子河東起淋漓大筆健摩空鬱  
律龍蛇蟠首尾自是才人數每奇鑠金衆口紛如蟻短策  
長辭鄩杜雲扁舟遠泛瀟湘水湘水連天天與齊曲抱衡  
山經九疑奔流直下青霄半龍嵒怪石濛迴磯翠嶂清泉  
飛百道就中一水名冉溪天陰雨濕山鬼哭頽崖斷岍哀  
猿啼倏忽平蕪掃霧潑元和司馬開生面青鸞鍛羽應無

聊不愚曰愚情如見卜築斜臨水樹閒留題暗鎖烟霞片  
溪山隱見會有時聲名遂使寰區遍自從被旨復朝天滄  
海桑田幾變遷祇餘白浪圍城下無復新詞落枕邊高祠  
突兀椽題古遺像塵封蛛網懸歲時伏臘走村叟蕉荔蔬  
肴雜几筵我來懷古訪前俗偃偻堂階還躑躅千百人家  
傍水居居人不解愚溪樂川原盡改舊時觀序記聊從深  
夜讀雄文直孕日月光千秋萬歲猶尸祝嗚呼千秋萬歲  
猶尸祝至今唐家宮殿萋萋芳草爲誰綠

題屈子遠遊圖

陳夢元

才人詞賦祖騷屈絕代靈均懸日月何來皺此遠遊圖丈

幅調刁動林樾遊魂熒熒去何之願聞往者赤松謁乘風  
高舉快所見傳說韓終時髣髴丹邱王子來宿之窈窕元  
精洗毛髮暘谷昧谷俱欲往飛轡幽都海濤汨祝融南顧  
長太息戒蚤還衡母悅歛吁嗟豈不思故舊極目九天誓  
心骨此縱有魂不得招三山明滅隔城闕我爲披圖詫奇  
絕筆勢俄頃蓬嶠越變幻紛紜有仙意拈管不貌孤竹蕨  
倘得屈子天問亦可圖成十丈幅玩畫勝慰遊者爲約約  
要眇和不滑且自仿佯容與貽我佚溪山深處長年便可  
老耕垓

題秋月汎湘圖

君不願乘槎直窮西海頭又不願縱棹汎覽五湖秋樂此  
容漾湘之水纖雲不動微波收俄焉夜色清照五六丈已  
是素月天邊流灘聲怒不作石瀨淺夷猶中流發漁唱道  
士仍衡留用韓文九面撐空太自在楞藕可數滙潭州君山  
何處望洞庭爲逗遛夜半瑟聲來水上雲旗恍惚下靈修  
抱瑟歛衽聞歎息秋蘭杜葯滿汀洲遊仙郭賦江天未謝  
生求悄焉坐我湘西寺冷冷方馭忽颺颺爲君得句生綃  
鏐君爲我歌歌且休人間孰倚此妙謳浮我太白爲我酬

王烈女

陳圭

石可轉山可移王氏女好男兒心如生鐵不可屈吳人楚

人未會知羞作顯者妾寧爲窶人妻毀粧對媒妁爾來復  
何爲可憐父母胡少慈祇矜女之顏容能居貨市奇不思  
女之手指能療凶年饑泉刀不入手忍心鞭扑之皮膚碎  
裂血肉淋漓聞者髮豎咸吁噉誰謂荼苦其甘如飴誰謂  
死不樂勝於生多悲誰謂小家女自賤肯同折節梯榮之  
眉畢命青絲繩破屋四壁風淒淒夜來山鬼門外啼一  
片香魂何處飛

九十六篙灘

灘在瀆夷二水合流處險絕難上有負其勇者曰  
此何難能爲我娶婦百篙可耳衆許諾及上灘止  
九十六篙衆爲之娶其人不數月竟亡婦他適舟  
人述之如此

九十六篙人壯哉誰家少婦堂前來九十六篙人已故堂  
前少婦誰家去瀆夷水滙成危灘青天可上上灘難至今  
水急風聲寒寄語灘前利名客莫使九十六篙力

遊大覺寺題我愚上人丈室

十年不到仙山下日日靈臺馳害馬三月春光村外村四  
山嵐翠空中瀉蓮社清虛小有天支公無事常晝眠入門  
不覺百慮盡上方風細浮茶煙僧雛誦經午齋罷坐參三  
昧通吟禪有客欲携都籃至芒鞋踏遍諸峯巔蕙肴蘭菽

足清味收攬風月歸長箋往日羣公此高會老將壇前聲  
威大今我顏蒼君白頭簪毫人盡空山邱人生得閒且行  
樂雪泥鴻爪東西留當前榆景隨晚收歸去還招雲鶴儔  
司空居士今休休盡力去花夫何憂

奉和陳雲樵太守同汪稼門制軍登岳陽樓簡閱水

師原韻

八百湖光天一碧包納三湘吞七澤制府黃堂同登樓踏  
盡梯階雙鳥赤水關分營排戰艦大翼小翼飛如風鴻鴈  
冲開魚麗陣虎豹突出龜鼉宮王濬樓船呂蒙艦撇淀乘  
濤水師熟尋常鼓柁黃頭郎倉卒指揮空張目歛然烟起  
轟雷霆戈戟聲軒暗中逐驚破老蛟難遁藏水府何處勞  
隸僕當年柵壘賊所都數十萬衆如輕鳧天兵飛來岳家  
似拾纖芥夷途趨昇平海宇清風灑江漢安瀾洗兵馬  
安部隨時武備修五十六珠落筆下我公見之還解頤大  
放瓊琚玉佩詞赤沙青草肅秋氣丹楓黃橘回春姿僚吏  
雲從五馬立紅旆前驅風習習神鴉亦解送歸轅飛過戎  
亭始歸戢

銅獸歌

弁序

文自奎

野人掘得銅器售於洪亦舫明經形似獸而中空頷  
有大德年號及鳳山書院篆文鳳山爲鄉先輩講學

之所文多漫滅不可辨亦舫偕侄翹岡有歌因次其韻

高山大澤精英留雷煥張華不盡究蓬萊仙人潛鼓鑄雲霧黶黶六丁守夔龍熊羆爭推轂牽犢挂瓢尙有舊頃聞神物忽玩世奇峒光怪價難售代號荒遠費參稽摩挲那辨山中壽俗子欲購更狐疑高齋坐致古銅獸鳳山精舍聯雲烟遺文遺跡幾經覲茲篆應作蛟蛇蟠欲推點畫恐迷謬獨喜中空容斗醪百篇吟唱快酬侑幾年高歌動鬼神巨觥故遣野人授取精定自若耶溪象形無乃岐陽囿喬松偃虬蘭吐玉蔭庭列階競靈秀寶光炯炯騰元夜元氣穆穆肅白晝竹林勝賞詩酒筵屈賈雄壘從踐蹂寫真傳神寄蝸齋驚呼狂叫雲濤就

過洞庭湖

余世本

洞庭春水濶春霽更沄沄我來春半月湖水碧於雲帆勢逼遠浦遙天影難分平沙望不極疑有波濤掀祇爲人人心懾洞庭險遂令浴日浸月之狀時在前我聞伊昔黃帝張樂洞庭野洞庭之野何如者冬盡春來水未盈銀沙漫漫萬頃平水退爲野溢爲湖楚天不斷楚雲孤冬春之際江水長江流混混接湖光湖光山色春正好但紀浩蕩殊草草村李格律爭奇特襄陽佳句豈易得相看夜上岳陽



樓燈火微茫雨未收就中欲識小范老子絕妙詞應待烟  
空月皓天光一碧之秋期

弔賈大傅

陳炯

大臣經濟文章伯洛陽年少南楚客日月經天河行地鉅  
製鴻篇人膾炙咄嗟絳灌不能容痛哭一聲應禡魄主臣  
豈曰不相知宣室夜半曾前席長沙自古風騷地屈宋聲  
名長奕奕命輔愛子拔其尤莫以僻遠爲遷謫沅有芷兮  
澧有蘭帝曰俞哉汝其適他時終復召公還雄才偉略資  
經畫雖坐卑濕命不延千秋留得治安策我來祠廟瞻仰  
頻故蹟猶存情脉脉江山寂寞身後名春波淡蕩春雲白

乙未秋訪真谷於法輪庵時李沅溪先至與寺中諸

友盤桓竟日長句紀事

陳惠

法輪庵後叢枝老抱以青山雲四繞門外池水清且長前  
村人家影裊裊我來棗熟稻收時日落碧天淨如掃重陽  
節後風漸寒穿林遶磴覺衣單繫馬入門欣見主粉壁虛  
白梵堂寬驀然復睹李生面兩情狂喜目爲眩人聞邂逅  
定爲常相對猶疑夢相見須臾頭陀上佛燈微耳鳴鐘聲  
片片牖南榮笑語香諸公盡是金闈彥陳子高標素所  
畏六載重逢若豹變式南竟體皆芳蘭使我對之常繾綣  
其餘颯爽盡英姿亦復沉潛不自衒匡王與鄧互亭亭騷

壇摩壘楚秦戰吾家玉樹頗疎森魯軍衛卒可備殿

時姪文煜

煥文等同肄業寺中

嗟予困蹶魄已禡華容走失腰間箭蹣跚來此

還四眺山鬼挪揄羅漢笑又逢霹靂鳴聲叫勅敵當前心  
忽掉依依金華去不得徘徊搜盡其中妙此人此夕此名  
山奇緣佳話關天造日月不老寺長留寫作風光萬古秋  
他年紗籠或袖拂盧胡一呷黃金甌

潭州旅舍偶題

陳熾

美人窓下刺針繡驀地低頭淚盈袖十三五女工成不  
是鴛鴦譜不就刀尺都爲別人操天吳紫鳳篋笥韜昨夜  
西風撲回來桂花香送好懷開可憐顏色如花好可惜賞  
花不及早沉沉更漏蹙雙蛾幾點殘紅拾襦羅嫁得阿誰  
知誰似如此風波無渡河

長沙鐵佛寺塔柱行次觀察梁冲泉先生韻

陳世楫

觀察梁公文章伯討論金石及浮屠鐵佛寺古塔亦古鐵  
柱作者嗟云徂益然導我歌聲發二百八十輝精廬慨自  
開元歷淳化是中有物憑而扶修廢舉墜遙唱和色相變  
幻天地鑪往者危標意欲隳猶以屹立傲然殊不有際會  
值大賢詎傳其柱傳其書公爲帥工搨萬紙勤爲董護護  
厥初乍看拙澁太史籀石鼓紙本神工驅乃知樛則有源

流投以說文無齟齬當時點畫鏡刻精願語真書聚東都  
句從西方衆口頌柱出七級千手摸微獨潭州稱壯觀將  
徧三江施五湖岫嶺顏碑暨李碑一一証嚮難含糊泗州  
僧伽未足數韓子才大公其如南臺集古此第一毫端揮  
散如貫珠法相擎空現丈六我來吉拜作禮膜深慚小學  
毋是傲對此畫腹頻脚踟惟公作則吾所師回首茫昧真  
可吁他時絕頂一眺望儀公句律求毋渝

黃甲洲晚眺

江流西下水悠悠夕陽廻薄江上洲鬱哉佳氣滿城郭蒼  
烟一抹淡不收石牛潭光澄菽萼馬鞍山色望縹緲此地  
清絕洗塵埃漁庄蟹舍相依少江天漠漠靜龜鼉好風吹  
動琉璃波隔岸數峯攢雲樹返照入江影婆娑銀箏翠管  
木蘭楫來向文浦荷落日驚鷗飛過白雪翻亂點江心何  
輕逸月出遙岑杳靄間水妃簸弄雙玉環欲覓羅襪微步  
處洲頭蘭芷空潺湲蒼茫忽認浮梁渡垂楊蘸水疑無路  
禹廟遺蹟杳莫尋長天一碧晚霞住此洲得名伊何年  
磅礴結秀臨長川地因人勝信有以黃甲繼美孰爲賢憶  
昔名流競把袂入耳絃歌見真諦

熙時文教昭海隅俎豆莘莘尙無替攸江之水滌泗清近  
溯濂溪道術明講院猶新鑿渠舊徘徊瞻眺跋余情塵襟

欲滌慚未已計取澄江一斛水白沙翠竹更相鮮環抱灣  
灣凝暮紫

詩五律

宋

過大別山聞子規

彭天益

後夜入杳冥遊人何處聽花殘斑竹廟雨歇峴山亭樹鏹  
月初落牕間酒正醒衆禽方在夢誰念爾勞形

明

題南海大士石刻遺像

陳順成

茫茫南海水石上寫真如挂壁來雲氣生香到草廬戒餘  
身世一定後性情除神足時時現瞻依只讀書

一枝空際灑點水露華如文湧東坡硯思深彭澤廬鈍根

粘處活幻夢覺時除爲拭前因淚慈雲護架書

題蔡朝端雪松軒

劉三吾

茶陵

爲愛雪松好臨冬挺秀姿一天皆白處萬壑獨青時老幹  
生銀甲橫枝走碧驪願言君莫負永與雪松期

北仙觀

彭友信

柴門一徑小春水兩池寬劍化泉空滿山迴勢欲蟠白花  
分北觀紫氣靄瑤壇道士晨經罷珊然解珮環

再遊方廣

陳惟順

泉流百折澗雲擁萬重山虎吼風生地烏啼月滿關蕙蘭  
噓馥氣杖履失愁顏天縱山人興葛巾任徃還

旅夜酬西涯

彭澤

急鼓春城暮高枝宿鳥驚風雲猶壯志杯酒且閒情流落  
依朋友驅馳媿弟兄床頭挿孤劍夜夜電光生  
落落餘生在三年歧路中淒涼聞過鴈飄泊歎飛蓬媿我  
非東野惟君是孔融只因天上月照見此心同

酬西涯

客居惟僻陋車馬斷經過聚散風中絮浮沉水上波詩書  
今已矣康濟竟如何梁父吟初罷臨風更嘯歌  
京國青春好羈人萬里愁宦情揚子渡鄉夢岳陽樓沈約  
腰全瘦楊朱淚不收百年吾道在此外復何求



御河煙柳應制

易舒誥

青煙迷御柳隱隱近漣漪密處藏千縷輕時露半眉魚無  
驚繫影鴉失舊棲枝魂斷前川客臨風歸去遲

江上夜月獨坐

迢迢今夜月耿耿去年心花影深藏砌泉聲暗入琴春雲  
停暮雨北鴈斷南音酒醒江風冷羅衣坐不禁

岳陽樓

縱目城樓外乾坤在眼前平分三楚地高壓九江天水落  
新洲出雲生遠岫連狂風吹粉蝶客思倍淒然

官道野望

都門清曉發晚飯宿昌平廣路風沙暗荒城鼓角清樹號  
聽似雨祠古看無名明日青山近吟詩指點行

送友

陳警

曉日都門道輕車一劍橫乾坤俱是客桑梓總闕情木落  
千山瘦霜高兩鬢清錕鍔原有用莫負歲寒盟

送洪尉止所省墓

尹臺 安福

懷君攸嶺北相見亦何期九世孤墳在百年宿草遺風霜  
悲逝景水木動遐思羨爾來孫孝長歌石馬嘶

文殊巖訪古澗不值

費思居

落葉空山道霜林接上方孤筇凌絕巘殘照渡橫塘沙淺

虎留跡霧深花隱  
房遠公不浪出何事去層岡  
皇清。

寄李侍郎振裕

文應揚

漢宮清漏起明月向人圓  
正想薇花省初開棣萼筵  
酒分仙掌露衣染御爐煙  
况是新詩好才名北斗邊

偕劉杜三諸子遊靈龜峯

陶汝璣  
寧鄉

泊舟峯亦霽人響集高檣  
山髻浮當閣河身曲向亭  
風霜窺蠟屐鐘磬報歸船  
步步松間露飛來衣上青

雪泊水陸洲

劉友光

未得成高卧朗吟招隱篇  
洲寒徒頌橘興蓋亦迴船  
笛遣梅通信琴知雨墜天  
風流錢相國傳伎憶當年

擬九日必抵石公采山堂  
狂飈中阻竟滯無人之野  
不堪逢令節往事各憑欄  
戲馬臺空寂呼牛我亦安  
才人鸚鵡岸紅袖駱駝鞍  
隱恨誰消得風光入鼻酸

寓江樓

劉揮

石外臨流眺心魂何自清  
半簾晨岫影一枕夜江聲  
月出牕先白雲來浪已平  
所親無俗態小憩却心驚

紫麟山

蔡合天

十里環山望蓮花一樣清  
溪聲喧半夜月色淡深更  
石露雲根斂風迴樹影明  
蕭蕭蘓隱意獨愛此山行

馬靈山

深篁藏古刹秋色四山中地僻常遊鹿峯高不碍鴻雲生  
多傍石旛動豈因風欲問長生術呼牛但養聾

雨阻崛山

劉捷

偶過崛山坐孤筇爲雨留辭秋風入樹餉客茗添甌木落  
冬初立庭虛竹尙稠吟成更漏轉滴瀝響松楸

元宵值雪

劉詢

今宵燈市裏雪與月爭光色映瓊樓燦影分銀樹涼夜深  
明過晝曉起冷添霜漫道天街滑須知瑞應長

朝陽巖

劉誠

勝絕幽巖地高空四望收捫蘿觀古篆漱石俯清流樹老  
疎還密雲深夏亦秋三山何必遠一夢已滄洲

楓仙嶺

陳履信

偶然逸興迥結伴縱幽攀杖策高低路雲移遠近山飛仙  
留笑兀懸瀑勢潺湲但得時披覽何須惜徃還

遊寶相寺隱真巖

陳之駟

寸骨付僧手攜來亦憮然山門危似卵洞頂坦如甑半壁  
分厨下諸峯落殿前還聞五六月陰氣欲成泉  
絕頂通天直山門一笑開豕牢剝石構鳥道拂雲回方丈  
渾如水身心渺落灰爲憐月出好夕望勝登臺

人間紅是葉巖上白惟雲未出天圍裏已將秋色分松根  
深不到鳥語自爲羣試發鸞音嘯遙遙四谷聞

吉王府遺址

寂寞龍孫去蕭條鶴苑空掖庭存夾道孤殿受斜風草色  
傷春綠殘陽覆地紅遙遙北隅上猶見數枝楓

吉國宮人盡節

國制防同姓親王不典兵寇來誰可禦輦去夢猶迎香宴  
休歌舞調飢待死生可曾傳衛警班馬尙哀鳴  
君王殉國難傳蹕幾時回老監留虛殿明璫聚冷灰堂垂  
公子戒國破美人災自古皆如此何庸起怨哀

頗公有江西之行兼約黃龍結茅

劉之九

陰雲幾陣合零雨晚瀟瀟五代繁華盡六朝烟粉消願飛  
江右錫須紉柳邊橋會訂黃龍約結茅聽海潮

送陳明府還天台

陳履淳

陶令吟歸去關河萬里迢湖平青草岸帆落浙江潮囊錦  
詩千首行裝月一船還家足松菊三徑任逍遙

十年單父令琴罷拂雙旌一水三千路孤帆兩月程波光  
明海日霞彩映丹城

聖主重循吏君看驄馬迎

茅齋新成

劉光鈺

偷安成小築卜地此荒村  
兩水中分徑一峯遙對門  
折花斜覆牖就石巧爲垣  
世事何常定歸期且莫論

鹿門山

夏之鳳

龐公樓隱處尙有鹿門山  
山色無今古何人共往還  
楚雲愁渺渺漢水去閒閒  
嘆息千秋後高風不可攀

大覺寺訪嘯菴上人

廖夢麟

仙山當薄暮繞徑白雲封  
鶴辨重來客人憐不定蹤  
虛燈聞落葉纖月下殘鐘  
話到忘言處浮生失所從

隱真巖

蔡上寬

爲覓棲真所因扶訪道筇  
徑荒梁代草門老晉時松  
入壑霞光沒穿巖日影通  
真人何處去過耳一聲鐘  
看山豁老眼出谷響孤筇  
送客亭無鶴迎仙路有松  
乾坤雲竇秘今古石門通  
煙駕返何日遙聽曉報鐘

泉軒

結廬不在大有趣卽堪居  
到處塵千斛此間水一渠  
烹茶多爲客垂釣不關魚  
已是忘機地案頭况有書

和陳南陔明府遊石龍峯韻

劉兆雍

才子雖爲吏難忘水石間  
携琴調傑閣馴雉步靈山  
潭影飛霞度松陰老衲還  
佳篇乘興得清俊絕追攀

靈龜峯

陳五玉



壁立一峯秀虬松攫石堅偶因修禊日得遂看山緣鶯老  
花裝徑潭空影徹天艤舟多韻事吟落夕陽前

照乘菴

劉世坡

最憐明月好無奈客秋何僧舍難謀醉孤懷且放歌管絃  
歡絕少鼓角悲殊多百年如電露佳節復蹉跎

送長沙崔青峙太守還朝

譚金聲

宦海夫何定春深又問津梅肥瞻閣在鶴瘦知官貧萬里  
憐才眼百年報國身

聖知如顧問肯道有門人

九日陳南陔明府招陪潘東柳讌集靈龜峯

秋風吹野色選勝入雲間九日登高酒千秋宴客山菊從  
徵士採松任大夫攀煞有臨江興追陪載月還

湘邸秋思

譚斯振

靜坐衡門下深心託素毫良晨沽美酒愁怨付離騷有徑  
風先掃無燈月正高隔牕聞細響鄰女落裁刀

江上雨何多高軒不我過詩成堪覆甕書罷未籠鵝階下  
盤蚯蚓墻邊長薜蘿遠山纔見影無奈又滂沱

寄衡嶽曉上人

王純鎬

白社前期在芳時已屢適湖洄空九回延佇有孤舟仙路  
誰云遠勞生自不由五峯秋月好飛夢及同遊

和陳南陔明府遊司空山訪衡嶽曉上人宿大覺寺

韻

玉壇千嶂外金刹五雲中  
仙令同秋水真僧足素風  
鳴鸞尋鳥道駕鶴問龍宮  
參盡三乘秘天花滿曉空

懷杜巖草堂

子美題詩處千秋一草堂  
荆湖留勝跡蘭芷挹餘芳  
故國生前恨仙槎夢裏忙  
無爲憐屈賈飄泊水雲鄉

嶽麓觀漲

清絕翠微嶠憑高洞八窓  
慶雲垂嶽岫靈雨漲湘江  
蝌蚪殘碑奠龍蛇萬窟降  
漁歌情宛轉並作采蓮腔

集北郊無隱山房

陳治循

高會頻年少探竒此際同  
吟詩偕舊侶貰酒問山翁  
梅帶窓前雪松招院外風  
爲歡須卜夜清磬萬緣空

步月輞菴

遠峯留雪照隨杖步東臯  
水曲天邊路山橫郭外橋  
同尋河朔會敢謂竹林豪  
清宴魚堪供樽傾月轉高

偕彭西亭明府遊靈龜峯

歐陽一瑞

公餘尋靜侶大地水雲灣  
編竹培山缺蟠松鎖石關  
雙旌拂露潤五馬看花閒  
潘縣風流甚詩名溢兩間

靈龜峯

劉愈

孤峯江上峙帶雨始登臨小徑當門曲歸帆隱霧深亂雲  
吞怪石竹影倒潭心漫與山僧話涼風吹客襟

九日登馬鞍山

劉傳敷

此地逢佳節龍山興若何晴雲飛翰墨流水引清歌秋色  
乾坤老壯懷日月過可憐無限意把酒對烟波

隱真巖

劉兆鵬

層巒開翠壁弔古問山人樹密花藏鳥溪清月照鱗捫碑  
丹篆古坐石碧苔新塵世誰真隱空傳此隱真

洪山寺

策馬尋山寺疏林畫裏看雲深微有徑日近似無寒空院  
人稀到回廊花半殘客愁無處著閒散愧儒官

山居

洪特書

歲暮返窮谷崎嶇度陌阡遠峯霾宿霧亂樹隱朝烟物我  
渾如夢陰晴不問天偶然逢野叟惆悵小橋邊

得日亭

張之蓮

爰木移花影亭亭跋足翔光華舒萬里紫氣滿三湘有志  
瞻雲切無才比驥良坐觀欣所得賓餞問陶唐

晚登香山

洪維

獵獵寒飈晚危峯挂夕暉偶吟紅葉句來叩白雲扉樵徑  
通幽曲鐘聲入翠微留題思御史立馬正依依

自攸北江至長沙舟中得五律六首 賀志颺

漸覺煙村迴春光一綫通江聲流向北山市面朝東岸柳  
搖新綠汀花綴小紅棹歌無限意放眼暮天空

望東市

一水橋橫劃人家兩岸居宜春門有帖惜別袖無書風俗

朱陳里衣冠許史閭舊遊曾此在落日渺愁余

泗汾

不見屏山臥行行近鐵河天低平野窄水漲合流多灘險

驚殘夢風嚴省舊病片帆催急進津鼓吼靈鼉

鐵河

輕舸江上泊愛此晚晴新斥埃無烽火觥籌迭主賓嶽浮

雲似蓋淥染草如茵借問瀟湘畔何人采白蘋

涇口

忽漫招提出粼粼白石隈鑿開神禹跡吟嘯杜陵才浪湧

前朝去船隨估客來圖經閒檢校隔浦晚鐘催

鑿石浦

江行如畫裏青捲一螺煙湘水最深際夕陽無限天波光

驅野馬風力跼飛鳶指點芳洲路騷魂何處邊

昭潭

洞庭晴望

文自軒

晴見湖光濶波浪依舊痕荒荒野岸盡點點白鷗翻滅訴

湘君怨追憐屈子魂風流仍未已江漢派洲源

拱極樓

陳圭

鷺身飛鳥上天影四圍看人語響空碧江心生暮寒雲開

三楚地風掃五溪蠻歲晏應聞捷斜陽同倚欄

車溪曉望

夢轉千山外柴扉曉正開宿雲猶護竹流水不移梅釣叟  
持竿去鳧翁拍浪來無人解幽意江上獨徘徊

弔王烈婦與家澹軒丈同作

有序

吾宗上舍某客於蜀娶王氏婦數月上舍卒婦摧  
毀矢志柏舟父母強之他適曰兒爲陳氏未亡人  
敢二心哉乃鳴於有司以夫橐中金析半爲父母  
終養半資扶櫬雨卧風餐隻身數千里抵攸卽爲  
夫營窀穸語家人曰乞葬師於瘞夫處爲我留坏  
土也先一女自縊家人因合葬焉時家澹軒丈與  
余會於長沙具述其事余曰烈哉婦之心肝其鐵

石乎遂卽席濡毫得四十字

青春送白骨萬里一身單只有湘妃怨寧辭蜀道難罷營  
千古宅也蓋丈夫棺他日交枝樹鴛鴦月影寒

江樓

一嘯空碧外江樓憐晚晴斷鴻風自急秋樹葉無情擊劍  
驚傭保揮杯勸友生吾儕更何事終古託高名

重登岳陽樓

月迥宜秋泛人如渡海來城邊方艤楫天上好揮杯山水  
真無恙登臨各有才神仙竟何事只解醉三回

石龍江



禹蹟何由至神功認五丁石穿龍眼大山劃佛頭青江海  
年空長滄洲客再經見時釣遊處萋草滿回汀

鶴嶺訪僧

文自奎

峭壁宜盤鶴何年錫卓山雞聲聞下界仙梵起雲間岳嶂  
千層出攸江一綫灣西來誰解意閱衆老禪關

漲落後沿溪閒步時甲辰五月

晴波初就道樹杪漲痕齊瓦石迷殘址魚蝦掠斷堤蒼茫  
憑夕照寂寞對荒溪大吏關民瘼炎埃簇馬蹄

衡山渡河

一棹剪江渡雙眸開大荒中流天影濶橫漢鴈聲長烟擁  
觀湘閣旗排運岳航早梅烘午日懷煦拜高堂

春日偕嘯菴上人山行

陳國棠

融融初日出掛在寺門東人過前村路香飄何處風落花  
流水上啼鳥亂山中此際惜春色老僧情亦同

早發朱仙鎮渡河懷古

歐陽立煖

天險限南北蒼茫一望賒千層翻白浪萬里走黃沙鐵騎  
摧胡虜金牌撼岳家至今遺恨在古樹咽嗚鴉

靈龜峯

鄧祖授

時復登高閣霜煙繚日寬舟航浮鏡裏鵬鷲掣雲端小坐  
天風入長吟佛照殘從來乘興地且莫厭盤桓

醴陵坡謁蔡江門先生墓

陳應桃

鼎沸湖湘日孤城捍禦艱  
糜軀同信國斷舌哭常山  
報得君恩重悲來母養慳  
臨終留數語點點淚痕殷  
鬱鬱佳城在行人駐馬來  
炎天淒白日碧血黯青苔  
廟貌千秋盛忠魂萬劫哀  
卓哉凌國俊特地一輿臺

題保寧寺方丈

劉泗霖

野衲逢三咲形容認往年  
爐溫新燧火甌拂舊茶煙  
禪味團蒲上詩情斗室偏  
碧紗題句在好結再來緣

寶相寺

譚昌詒

澗道陰將雨林深鳥不喧  
遠風來習習涼葉忽翻翻  
野曠蟲何怨秋成物自恩  
迴依僧舍憇寒水靜當門

馬鞍山

王緝熙

屹立雄郊外巋然一大觀  
何人曾駐馬此地尙留鞍  
細草添纓飾長江作帶鞞  
西流看滾滾千古障迴瀾

朝陽庵

張綬

曲折穿遊屐窅然一徑深  
人家丹嶂麓寺隱碧蘿陰  
落葉下斜徑夕陽移遠岑  
終年誰管領物外愜幽尋

詩七律

宋

司空山

彭天益

扶筇疑是出天台，雲鎖巖扃次第開。  
未得路通遊紫府，且隨溪轉上丹臺。  
藤蘿映帶皆天設，山水潏洄總地裁。  
歷歷仙家遺舊跡，清竒端不讓蓬萊。

紫麟峯

趙永言

千仞竒峯薄上清，葛洪於此尙留名。  
紫麟瑞靄春風暖，白虎丹成夜月明。  
點點蒼苔空有跡，萋萋芳草不聞聲。  
高蹤回首今何在，山水猶含萬古情。

元

塔燈

馮子振

擎天一柱碍雲低  
破暗功真日月齊  
半夜火龍蟠地軸  
八方星象下天梯  
光搖灩澦沿珠蚌  
影落滄溟照水犀  
文焰逼人高萬丈  
倒提鐵筆向空題

穀雨星沙雜詠

一從結綬侍青闈  
幾度吹簫月下歸  
吳殿風薰宮鴨暖  
漢臺霜早野鷹飛  
帆開弱水蓬萊隔  
局覆商山橘叟非  
莫詠離騷閒草木  
湘汀杜若正芳菲  
賦罷靈鳥却妬鴉  
石淙小住買長沙  
梅天帖潤來禽李  
穀

兩杯醒送鴉茶白  
髮流年丁去國  
青春逐客止還家

門外園堪賞荷鍾相從學種瓜

買閒得地暫逃名  
愁似春陰不放晴  
巷僻出門迂馬足  
雨多入夜沸蛙聲  
蔬應漸識葷腥卻  
茶豈能澆魂磊平  
且結故山櫻筍社  
啼烟擘畫杜鵑鳴

上馮海粟學士

宋 无 金陵

忠言如海膽如山  
促入金門香案班  
玉筍上林聯鷺序  
紫檀春殿謁龍顏  
才傾百辟星分耀  
賦就三都稿未刪  
豈向長沙淹賈傅  
臨風高唱大刀環

明

次蔡朝端先生贈楊尹韻

劉三吾 茶陵

詩句吟來盡雅音，奈無人聽伯牙琴。  
陶潛喜遂歸田志，龐蘊常懷遜世心。  
楊柳陂塘春淡淡，梨花門巷晚陰陰。  
多情賴有諸生近，節暇時過話古今。

贈鄧偉器

扁舟繫處柳陰陰，盡日黃鸝惱客心。  
霜膾登盤紅玉細，錦箋題字綠雲深。  
丰姿久識何郎選，詩思還推杜老吟。  
咫尺江頭翻似遠，無由朝暮一相尋。

秋夜和陳天民

彭友信

漫携短劍與長琴，十載江湖共賞音。  
仕路無成空抱璞，貪身雖飲不懷金。  
曉霜底事侵髭鬢，鄉夢何憑到枕衾。  
昨夜西風砧杵急，聲聲催斷故園情。

司空山

王偉

一溪流水奏笙簧，萬樹鳴蟬送夕陽。  
古廟尚存唐故事，斷碑猶有宋文章。  
司空羽化芳名在，野老登臨秋思長。  
坐對白雲閒出岫，半生榮辱已都忘。

同杜侯遊陽昇觀

浮雲捲盡露仙山，石磴層層手倦攀。  
千尺老藤懸峭壁，一灣流水遶元關。  
重遊預作明年約，縱飲聊娛此日間。  
服藥不須期碧落，十洲三島在人間。



名山福地世應稀  
樓觀鬼竅倚翠微  
古洞雲深龍化去  
老松烟暝鶴飛歸  
自從上相登仙品  
更有何人悟道機  
遊賞喜陪賢大尹  
壺觴連日醉芳菲

贈王侍郎偉告歸

商輅 淳安

科甲登名自少年  
歷官寧說古人賢  
賜歸獨荷先皇眷  
寵召多蒙聖主憐  
誓竭忠貞調鼎彙  
那堪疾卧林泉  
江湖身在心廷闕  
一騎還朝早著鞭

詠史

彭澤

歸來三徑已秋風  
籬下依然菊滿叢  
五斗折腰羞作縣  
百年多難早成翁  
義熙人物義皇上  
典午山河甲子中  
怪殺

潯陽江上水隨潮流過石頭東

南浦

長河風逆浪花回  
隔岸驚沙雜雨來  
歲月如流猶是客  
天涯無伴懶銜杯  
四愁不獨張衡有  
十漸真成魏相猜  
日暮離人最惆悵  
浮雲如霧草如苔

岳陽樓

平湖空濶水浮烟  
孤嶼依微樹接天  
歲月有期陵谷變  
神仙多事古今傳  
城樓吹笛風回市  
沙浦鳴榔月滿船  
細讀屈騷兼賈賦  
淒迷遺恨使人憐

北園踏雪

雪擁平園路有無短筇雙屐細縈紆身隨野鶴行應遠詩  
到梅花興轉孤灞上他年憐鄭老湖西無地著林逋便當  
喚取徐黃手寫作寒天一老圖

賀君世安貳守雲南作此送行

秋試會叨接後塵十年京國度芳春分符佐郡君先貴然  
桂携家我尚貧帆入洞庭秋草盡鴈回天柱遠書新平生  
知己今誰在別酒臨歧莫厭頻

八景與李西涯聯句

彭澤

瀟湘夜雨

苔卧清風缺岸崩彭湘江地濕雨相仍風回別浦吹還斷

李雲結層空散未能殘枕半欹聞墜葉彭短篷初泊傍踈  
燈明朝苦竹江頭路李拄杖何人共一簷彭

洞庭秋月

素月流空滿洞庭李君山照見一浮萍魚龍不動蕭蕭籟  
彭環珮猶疑杳杳靈萬里碧槎天上坐李五更清笛夢中  
聽濯纓更有滄浪詠彭醉倚高樓到酒醒李

遠浦歸帆

江接長空浦樹回彭歸帆落日共徘徊孤舟望遠翻疑去  
李曲岸移遲忽見來雲裏青山前日夢彭樓中翠黛有人  
開柴門纜石依然在李轉舵先期踏碧苔彭

平沙落鴈

樹空江濶鴈行斜李落影翩翩尚暮霞菰米水深遙認渚  
彭白萍風急更鳴沙孤舟野客依棲共李高閣幽人矚望  
還不似驚鳥飛不定彭也因南北恨年華李

煙寺晚鐘

日斜孤寺暮煙生李風度鐘聲過嶺鳴沙上晚樵爭渡急  
彭城中行脚到門輕藤蘿不礙前溪影李舟楫還貪到岸  
程却憶殘燈微雨後彭幾回依舊報新晴李

漁村夕照

數家殘照帶江灣彭楊柳成村釣石環淡淡竹籬浮水淨  
李渾渾沙渚着鷓鴣閒柴門欲閉先沽酒彭樵伴相逢却憫  
山猶有清歌對明月李夜深隨棹下潺湲彭

山市晴嵐

野市山深路入雲李嵐光晴翠暖紛紛行人出樹衣巾濕  
彭小屋開簾戶牖分望隔曉帘遙駐馬李聆隨春鳥靜鳴  
登湖南風景堪圖畫彭長使何郎憶范君李

江天暮雪

江雲初合晚冥冥彭萬木呼風雪滿汀天盡遠山無鳥跡  
李路遙孤野失茆亭漁洲裊裊寒煙出彭野店深深舊竹  
扁坐擁青燈聽蕭瑟李消愁賴得酒雙鎗彭

望陽昇觀諸山

陳廷璣

悵望仙山何處是白雲天際聳蓬萊尋常一路從頭問三  
十六峯當面來流水浮花歸洞口清風隨客上天台松間  
若見盧瓊在不惜殷勤送酒杯

題王節婦詩後

劉大夏華容

慈節紛紛宇宙間世稱陶孟古今難傳聞阿母生猶死成  
就孤兒苦亦安楚地閨門流化美陳家機杼斷聲寒鳳毛  
文彩輝林下老眼臨風獨愛看

香山

洪性

西風匹馬上香山絕頂登臨眼界寬舉手可攀紅日近渾  
身都在白雲間巖邊有樹千年老洞口無風六月寒莫道  
等閒經此地幾人停轍嘆艱難

易西泉簡討歸養

李東陽茶陵

行盡星沙更月橋始知天上有歸橈宮衣尚帶爐烟濕仙  
佩還隨玉露飄已向江山開壽域細將文軌說中朝西來  
青鳥南飛鶴萬里雲霄路未遙

前題

梁儲南海

清時頻見老萊衣一疏陳情子又歸芸草自應留館閣燈  
花先爲報庭闈身從紅藥堦邊去舟向澄江練裏飛珍重  
平生清廟瑟莫緣家事久相違

雷山清隱

陳警

昔人曾見漁雷澤君向雷山結隱居臘盡野梅和雨滴春  
來山藥帶雲鋤孤琴候客松蘿逕古鼎焚香竹石除老爾  
沙田隱君子夜深無夢到金魚

過草市登靈山

易舒誥

山中擬有種芝田我忽尋來破紫烟孤嶂似螺浮巨海兩  
江如帶掛長天雲生洞口衣常濕露滴松枝石欲穿一老  
休糧顏色異待予攜手共登仙

壬申秋避兵東都門外

南河盜賊頻驚客東郭蕭條暫索居九月又催彭蠡鴈十  
年不食武昌魚獨看黃菊遠高興忽報滄洲有捷書明日  
長風應萬里楚江花鳥正懷予

陸子淵太史見懷作

高才自是朝陽鳳同輩齊懸學士魚溪上最憐愁杜甫園  
中還有病相如三年楚國懷人夢一紙吳門隔歲書讀罷  
風前重展看不知西日轉堦除

晚步流塘

東風扶杖過流塘點點青山送夕陽亂石小橋江似練落  
花高阜鳥如簧桑陰半掩羅敷面草色遙憐陸子腸俯仰  
乾坤成獨得一聲長嘯水雲忙



泉源寺

偶借禪林半日仙却忘城市已多年尋僧漸熟巖邊路煮茗新分石上泉屋後鳥聲隨梵應鉢間龍影托燈傳蒲團學打趺跏坐縹緲金猊栢子烟

贈劉梧岡廣文

陸子淵 上海

洞庭湖水接三巴幾日扁舟擬載家劉向有經傳漢室賈生遺事泣長沙門前雪滿人還立壇上春來杏已花獨坐錦官城上月詩成須向杜陵誇

浮橋

龍 誥

躍馬尋芳作勝遊飄然身世馭長虬錦瀾水湧仙鼉斷金餅雲開蟪蝼浮題柱勲名曾自許濟川舟楫果誰酬夕陽江畔重回首盡是恩波到處流

北仙觀

譚 縉

十里山行日已曛田家道院兩歧分平生踪跡多塵土此日形骸寄水雲臺殿已無元鶴守聲名應似落花紛微茫仙蹟難追步徹夜燒香讀典墳

壽劉節婦

羅洪先 吉水

忠臣節婦一般般盡節無如守節難梅蕊曾經雪裏凍嫦娥原耐月中寒人間鐵石為心膽天上銀河洗肺肝胥慶一堂膺福祉笑看甲子又循環

陳鴻臚歸省

伍讓衡陽

熙朝文物似君稀日奉傳宣拜瑣闥玉珮欲辭金闕迴錦袍應惹御香歸洞庭野色含芳杜南國浮雲繞翠微此去暫須求綵服乘時未許著荷衣

洗藥池

蔡承植

一枝藤有大因緣挂到山巔別有天古樹千章圍薜荔懸巖半壁立雲烟纔遊白日飛昇處又到司空洗藥泉屈指齊梁千載後宰官惟爾是神仙

閒居柬友

劉泉

老狂真愛浣花居時事匆匆歎忽諸惜徃心情仍似屈知非歲月欲爲遠綠莎徑繞屠蘇屋紅樹門懸薄笨車穩臥江頭身更懶閒翻晴雨課農書

鴻鴈來賓爲攸邑茂才王三命賦

熊廷弼江夏

秋風蕭颯朔寒侵日見南天候鴈臨遠道不堪霜雪景高鶩寧有稻梁心一行陣列青霄影千里書傳紫塞音此際橫空驚旅思誰家對月又清砧

石蓮洞

劉膳生

不信仙源尚有津洞中難覓避秦人未終棋局曾留子行傍桃花擬卜鄰破壁寒更蛩有約孤峯冷露樹無春胡麻非是人間物欲向溪頭飲數巡

北仙觀

陳明遵

當檐赤日氣如焚  
跌坐真宜對此君  
跨鶴疑聞深夜珮  
開軒時望遠山雲  
仙踪莫問猶留劍  
身隱無他恥用文  
山水清音雖寂寞  
華筵絲竹幾堪聞

司空山

劉葵

卸却朱纓厭世氛  
山頭選石禮元君  
星冠頂上三花色  
羽服身懸五嶽文  
冲舉已傳當日事  
尋真猶憇舊時雲  
飛來瀑布灣灣水  
別有芝田鳥代耘

秋日寄友

劉習灌

山中寂寂獨登樓  
觸目停雲憶舊遊  
人在洞庭青草外  
時當桂露菊花秋  
吟殘梁父隆中意  
望重蒼生太傅儔  
從此蒲輪趨魏闕  
恐無暇日滯湘流

元日早朝

劉宏化

紫殿春開帶曉寒  
趨蹌萬歲共騰歡  
說經臣獻椒花頌  
祈穀恩頒柏葉盤  
時侍坐肅侍龍顏星  
乍落温傳天語酒  
行乾傳旨多慚聖  
寵思無補心地惟  
餘一點丹

謁寧鄉叔祖御史興邦公墓

洪雲蒸

青華溪水自年年  
御史灣名終古傳  
野老歡呼峩豸影  
行人訝有避驄烟  
焚黃自昔龍章重  
瀝絮於今馬鬣傳  
雲裔願言同報國  
千秋萬歲戴堯天

燕邸贈別陳藩

不堪客邸復離羣，獨喜鶯遷意轉親。  
幾歲芙蓉沱水上，此時枳棘涇源濱。  
北來就日逢殘臘，西去淩雲正早春。  
祖道相携何所有，燕歌宛委拂雕輪。

喜劉樸先見訪

郭都賢 益陽

八公何處是長林，三匝無枝倦鳥心。  
未就卜居騷解讀，若爲逋客鶴能尋。  
風雷大澤雙龍合，霜月高秋一棹深。  
歲歲蒹葭勞夢寐，足音空谷喜從今。

吉藩夜宴

文士昂

開筵樂奏動流霞，殿上珠明映絳紗。  
天子周京分寶玉，親王南國宴皇華。  
龍珍香起麈羈美，琥珀光生鵲尾斜。  
感激帝臣無寸報，願將樂善表長沙。

隱真巖

峭壁層巖宿白雲，登臨儘可出塵氛。  
花迷幽壑藤蘿古，洞接晴嵐石磴分。  
山逕紆迴苔欲沒，溪風層疊浪成紋。  
何時仙侶黃梁熟，巖上同餐坐夕曛。

皇清

賁園夜集送劉杜三歸楚

吳偉業 太倉

何所獨無芳草路，送君偏上木蘭橈。  
友生廓落疑秋夜，公子憂思學楚腰。  
人似好山添別苦，夢餘小雨惜歸遙。  
湘川

灘水根離處不盡江聲入洞簫

輞菴憇嶽堂落成

劉友光

新開白老一堂成粥飯隨緣卽化城礙月微嫌多樹影通  
厨猶算少泉聲雨中南嶽秋無限戰後北邙恨未明近日  
逋逃來竹下從他魑魅日縱橫

悠悠遠岫對閒扉嵐翠何能與我違橘柚天寒明細雨芙蓉  
霜後歎無衣有餘隙地移松補不下疏簾待鶴歸歷過  
名山難記憶留僧畫取伴漁磯時有畫僧同住

簡王貽上

越人五步矢紛紛羽族無驚不亂羣未解蘭香湘水珮空

移蕙帳北山文遺簪四海哀原婦修竹殘春屬右軍南嶽

獻嘲誰解得開軒收取自怡雲

匠石年來見夢頻可知橘柚果非倫誰將野繭蒙珠的遙  
望山疑絕玉塵漢殿不譁長樂酒洞簫傳誦六宮人梅花  
一意歸何遜嶺畔還開折後春時貽上初司李廣陵

雨中宿屠公遜山庄

峯頭一望水潺潺門雀無驚不用關玉粟難辭三日火雲  
高不下九嶷山江干車馬多時謝日夕牛羊細雨閒談到  
海天塵起處同將白髮換朱顏

春日飲洞虛觀



白雲片片出籬根，卧對清風掃殿門。  
移柳絲牽鶯喚友，隔松人報鶴生孫。  
杏花紅暖邀藜杖，竹葉清香散瓦盆。  
醉後快談龍可牧，一天烟月照崑崙。

春郊野望

陳五鼎

物華節序若相催，芳草延青入屐來。  
帶雪只堪悲旅鴈，杖藜何處問寒梅。  
擬將稼圃消閒日，未有聲名列上台。  
信步莫須愁路滑，野花遙映酒帘開。

秋感和王百穀

西風颯颯動高牙，四面歌吹雜暮笳。  
看折黃花傷歲晚，誰留青鬢傲霜華。  
秋燈搖夢醒爲客，明月愁人醉憶家。  
寂寂

杜陵祠下土，更無衰柳噪寒鴉。

過普渡寺兼悼興公

劉自焜

鶴林轉水久荒唐，誰曉黃金是佛庄。  
青竹千竿深委巷，白雲一片繞空廊。  
蕭條宿草殘陽塔，响沫游魚半畝塘。  
却憶皎然飄遠逝，懶吟誰與一焚香。

怡潭晚步

陳五聚

擁褐行吟繞石田，看梅花放到溪邊。  
嵐橫遠岸迷僧寺，風起寒汀罷釣船。  
古洞猿啼荒草月，夕陽人渡亂橋烟。  
自憐落魄空留劍，惆悵魂消欲暮天。

夜宿廣華寺

彭而述 鄧州

夜來谷口響鳴騶踏破寒山一徑幽好月偏能遲過客他鄉況復近中秋年深碧瓦凝新綠亂後金剛帶舊愁自笑楚山行欲遍蘧廬強半爲僧留

征車詰屈到山陬歷盡崎嶇尚未休路入雲巢堪下榻人當客邸易生愁梧桐葉落蟲聲急蘆荻風來鴈陣秋却憶籌邊勞

聖主還看躍馬過梁州

送歐陽晉侯之蜀

大學士李 壽 高陽

金牛路啟戰塵清壯志凌秋事遠征父老盡歸傳檄地關門猶識棄繻生花溪舊蹟詩中覓劍閣新銘馬上成舞羽

祇今需碩畫雄文共羨似長卿

和相國李夫子贈別韻

歐陽始亨

眉山霧掃日光清夾袋風雲起彙征簡界自應推上相旁求何幸及書生川崖列宿瞻重曜灑灑遺黎卜阜成盤錯自慚非利器感知徒復效虞卿

劉衡麓先生過訪

劉心湛

風雨瀟瀟春草深叩門君到益清吟誰能白首終歡笑只有青山不古今梁父行吟空抱膝花封製錦自鳴琴行藏豈必君同我卧對松風聽好音

送康景明還江西

蔡承先

與君惜別晚樓鐘執手悲歌賦更工此去美人違一水可  
堪落日問孤鴻挂帆無恙瀟湘雨攬轡愴然彭蠡風千里  
相思誰命駕各天難遣酒杯空

周令公自浙歸衡息景靈山有贈

彭繼華

吳越淹留獨草元歸來更喜有新篇寒鷺鴈斷雲邊影澹  
對峯遙樹杪烟情在醉中何用酒意存琴上不須絃非非  
茂叔窓前綠無限沉吟壓謫仙

趙太守絃五解組泊湘江雪中棹艇從之劉揮

寄來懷抱幾經年姓字何由到耳邊萬里未忘垂釣客五  
湖輕泛挂冠船題殘箋紙雪花映凍積船簪釵股懸不是  
剡溪人把臂寒江應笑子猷旋

過丁弼武亦樓

蔡而偉

溪上樓成景色幽遙巒翠碧一庭收孤尊靜坐荷花雨滿  
榻高吟桐樹秋時袖殘文商遠磬歸携明月上寒流小園  
燈火蟲聲內因拂佳函屬紀遊

首夏登石龍峯

蔡來徵

登臨有暇卽乘機聯騎尋幽穿翠微地僻松能逃世劫閣  
危雲欲上人衣簾開簇簇峯千疊洲隱家家竹一圍底事  
塵緣慚未斷便將遊客並催歸

迴鴈峯

曾從嶽頂踏龍蹤又上衡陽第一峯  
鴈自北來飛不過山於南紀表爲宗  
參差城闕依湘水高下樓臺映晚春  
遙指祝融何處是插天幾片碧芙蓉

撫軍幕中贈王赤雲初度

陳之騷

幕下芙蓉庾子山翩然笑揖五侯間  
不經風雨客何邇半隔園林家未還  
見說千年遲變鶴肯令五柳怨飛鷗  
曲江池上風光好鄴架新書取次刪

草堂

胡作傳

寂寂窮年卧草堂懶將世事計參商  
天邊孤鴈蹤多遠野外閑猿嘯獨狂  
青草不除處士宅白雲常入老僧房  
澆桐卽有天台趣何必烏紗任徜徉

張明府雅集宜樓

劉新鼎

細雨宜樓暑氣迴一樽恰趁晚涼開  
江流入夏瀾初定山色浮空翠欲來  
待月人同開府興倚雲誰是仲宣才  
絃歌到處催行樂風雅如君有幾哉

靈龜峯

劉起光

簷鈴細響愛風搖積雪閒愁望裏消  
歸鴈背天雲漠漠飽帆衝浪水迢迢  
幾行醉墨山前秀百嶂流鶯樹底嬌  
恰好詩成供嘯咏一村疎雨點春苗

望嶽

文枚

獨立蒼茫極望迷誰從七二辨端倪雲開絕頂鴻愁翥路  
亘長空馬欲嘶隱見青痕入湘界濃纖黛色落湖堤舉頭  
劇有登高興須踏晴天萬仞梯

南雲八景

邑令陳溥天台

龜峯觀濤

縣東三里孤峯獨峙下臨大江春水方生於焉觀  
濤

孤峯東抱大江迴江上飛葦梵閣開風鼓鯨鐘搖海嶽月  
明蛟窟見樓臺千林晴靄薰吟屐萬壑流雲瀉酒杯最是  
桃花春漲好驚濤吹作雪山來

北仙招鶴

北仙觀後有招鶴亭爲張真人建

跨鶴仙人去不歸北山遺蹟尚依稀池名試劍餘龍氣臺  
化吹笙記羽衣半嶺松濤飛夜雪一龕蘿月鎖秋暉亭前  
幾度遙招手華表重來事恐非

金溪仙蹟

在司空山舊有道觀今改爲佛刹

金溪溪上維摩室舊是仙人禮斗臺雙澗雲蘿留古月六  
朝碑碣鎖蒼苔藥池春暖琅莖茁丹竈烟消白日迴夜半  
松梢風瑟瑟猶疑仙鶴駕空來



漕泊花石

一名獻花巖下有伏流二十里出爲羅浮江  
烟巒迴合繞琳宮宮下飛泉絕壑通石破倒窺天一綫崖  
穿低指路千弓珠探驪窟須燃燭花散雲根不借風解道  
真源流不息羅浮江水自朝宗

丹陵夜月

丹陵橋橫亘平野夜月之景彷彿蘆溝  
日落江村逗晚風斷烟殘靄散晴空千峯有意來明月一  
水無心抱彩虹波影滌洄金潏灩灘聲搖曳玉玲瓏天衢  
夜色明於晝人在冰壺朗鑑中

雲橋秋色

上雲橋北有峯獨高秋朗登眺遠近丹楓爛若雲  
錦

霜染楓林爛若霞青山秋晚鬪鉛華倩將綺陌三春色幻  
作寒原十里花江上曉嵐迷過鴈林邊殘照誤歸鴉西風  
慎勿輕吹泊留與遊人任鈿車

斗壇翠嶂

斗壇觀南有一嶂高百餘丈聳出雲表望之丹碧  
異狀

飛霞千尺冑晴峯紫石蒼崖路幾重地逼雲根開罨畫人

從天半數芙蓉巖泉濺雪迷雙屐草閣凌霄拄短筇今夜  
遊仙端入夢山前有夢仙菴莫教浪打五更鐘

龍湖梨花

邑西五里瀕河洲地多種梨樹每春時花開一望  
如雪

何來一夜天山雪飛入龍湖郭外村春去尚留新蝶粉香  
繁猶認舊梅痕枝頭細雨尋殘夢林下輕風洗濁尊幽豔  
劇憐烟月好一卮小坐到黃昏

祝融峯同竹上人夜坐

文 藻

雨餘秋氣冷谿堂曲几踈燈引興長方外交遊多法侶牀  
頭酒熟待重陽孤鴻叫處霜天靜叢菊開時野徑香臺省  
書來頻寄問不知吾鬢已蒼蒼

暮春同曹補菴先生江樓晚眺

劉兆雍

綠意紅情任剪裁登樓風景重徘徊飛光不受垂楊繫積  
緒偏從好月開春鴈影隨流水去酒船聲向晚雲來曹郎  
有興招同醉錯認劉楨二斗才

千葉林

古刹名在甘棠山北今廢

歐陽昊

踏碎赤霞遠逐仙數間精舍倚山懸巉巖鹿走青霄上古  
木鶴巢銀漢邊盡日靈雞聞法語終朝頑石想談禪清癯  
僧老携瓶出剩有曇花遍地妍

同胡祁緒蔡長容飲柳村別業

陳標

無從九日共追歡  
續得開樽白玉欄  
綠酒客逢今日集  
黃花人是隔年看  
池塘鳥亂波紋影  
木葉風添暮景寒  
百里有人占太史  
小星何意犯詩壇

長橋

陳棟

重到長橋事事非  
昔時景物尚依稀  
陌頭少婦携筐出  
社日田翁半醉歸  
綠柳村村含舊恨  
浮雲片片傍斜暉  
策驢晚望崎嶇道  
無限悲傷涕滿衣

春日同諸子遊石龍峯

劉其濤

孤峯突兀與雲齊  
江畔維舟日未西  
爲愛雙流爭翠浪  
故携斗酒聽黃鸝  
羨魚欲學臨淵釣  
看竹難尋彩鳳棲  
歎息扶搖程萬里  
何當共上碧雲梯

隱真巖

劉來垣

翠壁千尋倚大荒  
朅來憑眺俯蒼茫  
日當空際羣山小  
心到幽棲萬慮忘  
野鶴撩人窺石室  
閒雲似客過僧房  
蓮池萌實今還在  
寂寂仙踪下夕陽

江樓雜詠

劉銓

孤城高閣俯沙汀  
嶽色遙分十二屏  
野菜花黃催蝶粉  
詩人頭白恨山青  
帆歸遠浦春如畫  
網集澄潭火似星  
最是鶯聲啼不住  
柳陰缺處一茅亭

隱真巖

鄧士綸

何年鬼斧鑿山腰  
霧幃雲屏鎖寂寥  
野老依稀談往事  
殘碑彷彿認前朝  
花能按歷無須紀  
鶴解馴人不用招  
翰與老僧閒領畧  
焚香趺坐自昏朝

憑虛閣次李世求學博韻

劉傳相

閣高數仞振山巔  
偶一憑欄別有天  
波弄漁舟浮爽氣  
岸迴秋菊起寒烟  
老松得月時招鶴  
幽洞生雲倒映川  
顧我登臨無限意  
如君興致自陶然

司空山

鄧承祖

雲烟深處是仙家  
曲曲洄流一徑賒  
珠樹猶棲千歲鶴  
瓊枝仍放六朝花  
苔侵丹竈鏽全蝕  
雲拂星壇石半斜  
閒說當時冲舉事  
笑看天際起朱霞

司空山

胡士註

一水滌洄古渡重  
東來紫翠望仙蹤  
舊池烏啄南齊藥  
老殿人呼晉代松  
斗石風生長日掃  
洞門花落幾時封  
蟬聲樹樹催歸去  
山下逢僧話晚鐘

七夕宿桃源洞

余彭齡

銀河渺渺一橋通  
不在桃源溪水中  
有意合歡驚鵲噪  
無心避世任花紅  
蛛絲忙殺小兒女  
桑徑閒來半老翁  
客枕夢回都覺幻  
年年秋色與春風

秋日讀書輞川

廖夢熊

野寺年年抱一經重來几榻媿留停無才可老天多事有  
恨難澆酒不靈紅葉打窓秋颯爽翠筠遮徑月零星古來  
賢達先窮餓醉向風騷問典型

隱真巖

廖夢麟

迢遞花源覓路遲此中曾住有仙姿雲深山暗漁樵徑鶴  
老松巢琥珀枝耐客流連高下洞勞人惆悵有無詩柳村  
先我耽遊趣我欲乘閒問紫芝

和潘大中丞星沙遠眺

王純鎰

潭州清絕水雲鄉千里湖山風景長盡日翠微來絕嶠繞  
城寒碧接滄浪咏騷人去幽蘭在鼓瑟祠空薜芷芳高望  
定知勤物色肯容楚客製荷裳

同洪利撫泛舟遊寶寧寺別後却寄

勝地於人似有期良辰筋力強爲支江山興盡誰能賦草  
木年深自不知三五同心蘭葉粲參差信口竹枝詞因聲  
却寄洪崖道倘著人間白日遲

壬午五月望後夜集司空山

望月真同秉燭遊無須接道軫如流羲皇天地閒鷗鷺陶  
謝風流一壑邱竹塢清香生藥臼松梢明月上經樓宵分  
葛杖支危徑玉筍參差擁白頭



汨羅江

張光華

楚厲迷魂招已闌  
汨羅江上暮雲寒  
千年波水漂筒米  
二月春風長佩蘭  
赤豹猶聞山鬼嘯  
文魚難逐美人歡  
九嶷斜照青山晚  
惆悵雲和不再彈

醉墨亭

劉登庸

嫋嫋清琴一曲徐  
閒將放鶴伴雲居  
應知學道有餘化  
縱使宦情不廢書  
噴霧已傳標粉署  
濡毫還看沛清閭  
他年鶯語臨江北  
敬向棠陰覓姓余

上修撰周雨甘夫子

劉有輝

片玉含崑寶氣浮  
碧紗名字重皇州  
濂溪霽月秋毫澈  
渤海高風石閣留  
澧有蘭兮勤采擷  
心如水矣見嘉修  
清芬頻挹宮墻近  
擬向春風紀勝遊

御賜

湖南學臣吳敷教在寬匾額恭賦  
雍正十三年 劉重輝

思皇培植已如林  
樂育菁莪尚有箴  
天語溫傳三殿啟  
墨花飛處五雲深  
賢臣難得頌於古  
佳士如香薰自今際  
此文明真莫負趨  
蹠拭目奉丹心

金川大捷恭紀  
乾隆十四年

劉介輝

春風二月滿皇都  
露布馳來蜀塞隅  
八日凱歌千驛度  
七旬韶樂兩階趨  
如天濺澤開新徼  
向關丹誠洗舊污  
從此蕩平昭大武  
麒麟又繪紀功圖

受降臺敞百蠻間泥首番酋虎帳環奉約始知天浩蕩來  
庭不憚嶺孱顏黃旗曉日輝珠岫赤舄清風洒瘴闕職貢  
卽今看絡繹玉珉璀璨勒銘還  
上相班師棧路回夷庚休藉五丁開雕弓永戢空藏月  
旌席安行未破苔偃武雍容觀七德崇文灼爚映三台欣瞻  
川嶽懷柔徧不數饒歌漢道恢

靈龜峯

彭廷梅

峭壁幽尋步緩趨廊迴厓仄駕雲衢人從天半聞鐘磬寺  
轉松陰入畫圖遠水淨圍千竹翠澹烟晴染一峯孤搖搖  
小艇青帘外風裏漁歌乍有無

春日遊嶽麓

橘洲洲畔繫蘭舟直上高樓縱遠眸兩道河流新禹廟萬  
家烟火古潭州南來衡嶽山餘足西望湖光水盡頭森森  
汨羅三舍地紅蘅碧杜使人愁

黃甲洲春泛

蔡上宰

看花出郭眼偏明黃甲洲前春浪生宛委斜通山澗曲澄  
泓直與石橋平隔航簫管清兼壯逐浪鳧鷗避復迎安得  
同舟依李郭飄然人望若仙行

文明塔

陳兆星

高摩霄漢礙飛鴻級可潛升望不窮足躡風雲平地上身

依日月半天中一峯峻峭孤山小八面玲瓏鳥徑通笑指  
烟霞飄渺處飛來江畔羨神功

春日淶溪橋偶成

蔡方亨

心裏閒愁醉裏添江干慵問酒家帘十年情事春過眼斗  
室風光雨閉簾旖旎花枝芳自惜呢喃燕子語空織帷燈  
欲正新篇字已愧生涯負筆尖

王隱君自西湖歸

劉其灝

兩載山齋賦索居喜君旋旆正春初鶯花幾日聯詩社吳  
越頻年縱筍輿七里絲綸人在否六橋烟雨柳何如尋芳  
訪舊都奇絕此日瓢囊總不虛

送李世求學師還里

歐陽定樞

披拂春風雨露生柳枝無奈別離輕權衡朗映高秋月騷  
雅律諧清廟笙閣下絲綸終得意帳邊金石獨留聲明年  
二月桃花發肯許門墻挹遠旌

秋夜獨坐江亭

胡一舟

一輪皓魄麗霜天錦浪層翻畫閣前楊柳堤邊浮釣艇芙  
蓉江上淡秋烟胡床嘯傲元規達濁酒酣吟太白仙風景  
留連剛夜半此中清味少人傳

喜劉士荏應檄輸穀

陳治本

雍熙有象正春融桑梓平看協氣通解阜已欣歌化日積

儲尤樂暢

皇風從來九里膏生潤卽此千倉義可崇好善如君真不愧指困何事卜年豐

上巳和陳南陔邑侯

洪如似

華堂高敞艷陽天修禊遙從異代傳人物雖非東晉日風光猶似永和年綠楊影裏迷新燕紅雨聲中響杜鵑縱飲狂歌消晝永由來至樂是林泉

蔡江門司李殉難詩

蔡上興

百萬生靈仗此身不堪孤旅殄黃巾湘流洒淚思親日楚岫含愁報國辰何意掌門官杞子誰憐推位死張巡潭州

終古留遺恨司李如公第一人

謁岳少保祠

艱難仗節整孤軍遮道香盆企策勲指口迴鑿安社稷瞞天矯詔走風雲千秋碧血銜三字五國黃沙掩二君痛飲未酬臣子恨椒漿敢奠泣餘曛

浮雪洞

洪如葛

盤紆詰屈類蠶叢怪石蒼虬烟靄中應是騷人留墨譜却疑樵叟話仙蹤樓臨絕險天衢近龍卧寒潭犀照通盛世桃源寧避客南陽子驥得相從

龍泉港

劉士蘭

漫說神龍豢有方，碧泉深處吐祥光。  
流通文浦飛潛幻，源出花坪霖雨香。  
釀酒不須覓玉液，濯纓何必問滄浪。  
閒來別業倚楹望，時見成雲噓氣長。

赤壁懷古

劉樹棠

橫槊何年戰血橫，江流滾滾怒濤生。  
柴桑已定三分策，孟德猶誇百萬兵。  
一炬功誰完漢鼎，二喬春自老吳城。  
如龍如狗皆黃土，詞客經過夢亦驚。

慧光寺題壁

王純鏞

十年綈帙此辛勤，暮鼓晨鐘耳慣聞。  
佛地不廻三舍日，仙山誰見六朝雲。  
振衣金闕飈輪促，點雪丹爐火色分。  
記取司空遺跡在，石壇高處禮星文。

司空遺跡在石壇高處禮星文

文浦晚步

鄧世謙

葛衣新浴稱微躬，散步踈林曲徑通。  
野水乍添何處雨，浮雲忽斷此山風。  
牧豎蹋碎平蕪綠，樵返肩殘夕照紅。  
徙倚忘歸貪極目，暝烟深處一聲鐘。

贈陳春江太史

彭維新 茶陵

林栖倦翮謝凌騫，花徑閒看戲蝶翻。  
欵戶遠來三館客，掩關交繹五經言。  
夜闌村釀留蕉葉，春老山肴簇菜根。  
澹泊儒門風味別，知君不厭柳橋軒。

高舉蓬瀛異小鷺，歸耽舊舍息續翻。  
垂崖句正須人訂，醜



茂才非藉自言春望芊綿摹草色山行登頓倚松根平生  
懷抱爲君盡剩覺眉軒更體軒

秋日登岳陽樓

陳炯

危樓風起水吹腥一笛秋心滿洞庭漢口雲開三楚白湘  
南天插九嶷青橫空鴈字鄉音斷入夜漁歌客夢醒回首  
燕公舊遊地蒼茫浪打蓼花汀

楚山層疊楚雲多三醉仙踪渺大羅遠岫當中盤鶴鶴重  
湖絕岸走鼃鼃柳郎井古烟迷橘軒帝臺荒雨漲波擬泛  
蘭橈派江渚芙蓉採得待如何

鳳山雜興

張文輝

春來何處最幽遐鳳嶺嶮嶮入望賒鴨爪飯炊山逕火貓  
頭笋熟野人家石間流水鳴清籟雨後芳林落晚花指點  
青蒼吳楚路羅浮江畔夕陽斜

王漁洋感舊集存劉杜三先生詩讀竟感賦

陳夢元

扶輪先正憶漁洋疏剔遺音紙上鏘攸水至今多激越桂  
花留韻倍清揚自存歌調淒荒壠豈意風烟發錦囊片玉  
貺余情黯黯思鄉歎逝可能忘

登震陽樓次少陵陽城郡王新樓成韻

森聳東隅氣象生登樓詩較賦先成無須組麗揚雄博莫

學浮漂元正輕張席錢停飛蓋與吟風歸珮穆如清九能  
在昔矜文藻憬抱縈紆姬孔情

北仙觀尋陳島孫先生讀書處

洪藻

名山風雨幾人傳好向仙區問謫仙國市懸金猶此日春  
牕視草憶當年注經筆洒松林露浣手香生玉井泉我欲  
買山情未已移來一榻白雲邊

正月十六夜同李澄川學博集司空山王淑

碧山仙客上清遊瑤室虛無集勝流但說無生猶是障也  
聞不死在斯邱六朝事問烟霞窟紅葉秋登縹緲樓明月  
幾時如此夕莫令閒過隴西頭

長沙懷古

王泰

一城風雨晚瀟瀟今古無端入望遙割據雄圖成往事興  
亡遺跡問前朝陶公壁壘荒烟盡賈傅祠堂蔓草凋鴈下  
南天秋又老江聲浙瀝雜漁樵

嶽麓雲峯擁翠來登高遊眺意悠哉碑銘半滅隋唐字蘭  
蕙空悲屈宋才湘竹斑留今古淚巴猿聲送短長哀熊湘  
閣外科陽路三楚風濤入酒杯

耒陽杜少陵祠

陳圭

家國憂深耒水濱殘生誰伴苦吟身從來七澤風騷祖更  
有千秋俎豆人唐室天迴秦地日花溪香冷草堂春我携

公集荒祠拜一擊清鐘一愴神

嶽麓

浮湘一面故亭亭嶽勢南來接玉屏  
風峽吹開千樹碧鶴泉飛破四山青  
常疑仙梵從天下時有漁歌隔水聽  
此地朱張留道脉至今深夜見文星

九月晦日登天心閣

落日城尖一振衣閉門心事已全非  
青楓青草蒼茫合黃葉黃花歷亂飛  
豪氣似波平不得好秋如客送將歸  
遙天風起鵬聲急一點寒烟破翠微

鳳凰山

岳州

下雋山前血戰場鳳身棲處鶚難翔  
屯營勢剪南藩逆開國功成異姓王  
殺氣秋森遺像肅頽垣風冷古祠荒  
太平時節烟塵靜幾樹碧梧留夕陽

甌箏山

岳州

一峯鑱入蔚藍中石骨磷磷欲破空地鎮東南  
生氣色天開雲海出鴻濛遊人未結烟霞想  
樵子寧憂虎豹叢可惜茲山雄楚望不  
會高處着靈宮

九華山

岳州

九華寒色碧芙蓉一逕陰陰樹影重  
雲氣散流南下水花

香吹到北高峯息心好聽齋時偈行脚誰聞飯後鐘談罷  
三禪出万丈數聲啼鳥寺門松

雁塔橋邑東鄉

萬里朝天伯水濱華旌掣地起清塵要知雁塔鸞臺客元  
是高車駟馬人莊外山田紅杏亂橋邊江色綠楊新祇今  
題柱還如昔前代風流過眼頻

金水井邑東鄉

何代真君道姓楊御風來乞白雲漿汲甕正惜清江遠鑿  
石旋飛活水香塵世向來元海蜃神仙到此亦滄桑行人  
更有相如渴閒倚茆檐弔夕陽

猴子石善化縣西南

潭州驛路石呼名東指猶猴踞岸生山鬼嘯雲驚怒攫江  
豚吹浪過啼聲夢來巫雨身如沐吸盡湘烟骨自輕過客  
漫愁風色厲賦茅何用揣平衡

馬希範銅柱

路穿錦水峯攢戟標建雲臺柱削銅蜂蟻向來屯瘴地貌  
貅會此振華風書生銘筆千秋壯上將軍麾五代雄馬氏  
征蠻多故事後人還憶伏波功

蔡忠烈二首

戰血橫流楚水涯妖星一夜犯長沙雖無專閫三千卒尙

有孤城十萬家出土寶刀寒是雪沿江金甲亂如麻虎頭  
山上書聲激氣撼斑奴失爪牙  
掌上孫吳計莫陳南天半壁守臣身先亡自許同袍友終  
養誰憐白髮親城內風雷轟幾日墓前梧櫬鬱千春醴陵  
坡上叢祠在一盞湘泉薦藻蘋

白馬磯弔裴侍郎

曉向烏臺脫繡衣閒雲一片自南飛入山不戴神羊角臨  
水時登白馬磯陰罷謫仙回舫去彈餘釋子抱琴歸鴨欄  
驛外江天廓看遍朝嵐與夕暉

仙人橋邑東鄉

鑿翠鑿青萬仞間石根忽見碧潺潺偶逢野老行相語太  
息仙人去不還終古飛龍常跨水幾人駟馬許登山漫披  
雲霧摳衣上細草幽花滿目斑

文自奎

孔明車并序

其制截巨竹丈餘倚岸立水剗削其節中空無礙  
下口窾棕木五六寸銜其半半缺如瓦環口交縫  
彌以敗絮內嵌十字門以牛皮皮員大視竹裏鍵  
其偏使可開台外擇小員木橫直各一直者長四  
尺餘貫小竹筒二寸許皮如錢者三枚大亦視  
竹裏爲度周漚充塞木與竹筒連筒之前皮



之後竹丁禁之俱不復動湧上下橫者交於直木  
長二尺有奇其入之泉水也先挈瓶注水竹中木  
口所鍵皮隨爲啟閉水輒乘木之進退噴玉濺珠  
一晝夜可遍三四畝

灘尾驚傳滅鷺濤籟離立倚江臯千尋水府通呼吸萬  
族金鱗遠遯逃野外風生怙穗起山頭月墮衆聲囂青葱  
一握涵元化何似甘霖滋土膏

湖中望君山

文舒璣

浪裏孱顏眉黛分夷猶湖畔望夫君千年花草叢生石終  
古蛟龍欲噴雲娟妙誰從峯頂見有無聲寄愁中間風恬

我卽振衣往進頌忠魂屈賈文

題長沙多佛禪林壁

陳峻

原來無佛此心依况以多名佛更非只有千潭孤月印或  
看深樹片雲歸雨餘趺坐閒題壁春晚披襟任浴沂寄興  
自然隨意足方輪膏轉詎庸豨

蔡生天錦兄弟之母劉氏節孝詩

學政

倪國璉

仁和

鵠影孤鶩悵卅年茹荼飲藥寸心堅持門辛苦繫勤止陟  
岷丁寧尙慎旃子舍待營三鼎養孫謀真裕一經傳觀風  
乍入輶軒采彤管芳名取次鐫

劉寅甫妻費氏挽詞

吳世錦

藤說丁公藥不靈秦樓夜半水風腥貞魂合併鴛鴦塚舊  
夢生憎孔雀屏曉鏡粧殘嶽雲白翠鬟腸斷楚山青九泉  
泣向阿郎訴松柏森森繞檻櫺

司空山

鄧林花

名山終古屬神仙梁代司空蹟尚傳自向煙霞尋勝賞早  
拋簪笏謝塵緣清虛躡景曾招鶴遠近焚香亦慕羶拂拭  
殘碑蒼蘚字青鞋布襪任流連

萬筠庵

劉玠

百道流泉響碧潺萬筠庵是綠陰環榻來似入延春閣到  
此何殊銷夏灣青嶂時聞啼鳥換白雲常伴老僧閒繩床

次第攤經卷摩詰應教俗諦刪

登憑虛閣次張荷塘明府韻

陳國宋

爲愛靈山梵閣重閒携賓從躡織茸村村未放鶯花老處  
處遙連竹樹濃興至尊前爭擊鉢吟成海上記撞鐘由來  
鄧曲高難和長占梅城第一峯  
鹿苑東邊洞壑重琳宮高踞碧蒙茸桃蹊過雨懸脂濕柳  
徑含煙翠黛濃仙吏公餘猶蠟屐山僧梵放乍敲鐘自從  
勝賞聯吟後不負梅城第一峯

司空山

鄧祖授

層巒迤邐接衡峯遠眺南齊仙尹蹤厓下雲根盤伏虎池

中石髮護降龍斗壇恍惚清風掃丹竈依稀宿霧封何日  
拂衣尋大藥飄飄笙鶴此間逢

壽恭紀 嘉慶十四年

譚國仁

壽寓瞳瞳瑞日新依光草木總恒春滂沱醲化環滄海浩  
蕩祥源啟

紫宸有極福疇原錫洛無疆吉頌競吹豳警軒願獻康衢曲臣  
是堯時擊壤民

菲才何幸際昌隆雨露分霑

帝里中竿執磻溪成皓首葵依魏闕抱丹衷隨班雀躍

恩光煦錫寵鳩扶禮數崇敬綴蕪詞宣蹈詠醪醑醴醉春風

登憑虛閣續沈張明府韻

洪開灃

泐泐分趨蹴浪重當垠有寺簇纖茸鳶魚目送迷高下煙  
雨春嬌任淡濃生佛偶臨翻白雪騷人乘興叶黃鐘珠聯  
玉唱知無敵珍重梅城第一峯

晚春登西閣

陳宏觀

西閣峻嶒霽景開登臨亦擬小蓬萊行看島嶼春深淺坐  
對帆檣日往來遠樹隔江森似薺澄波照座碧於苔遊人  
不盡尋芳興相與提壺倒舊醅

經司空山大覺寺

選勝東舉地勢偏紆迴石磴路頻穿青山綠水原終古翠

竹黃花別一天殷闍鐘聲時激壯凌虛梵唄益清圓丹爐  
藥臼依稀在剩有南齊古刹傳

營道謁濂溪夫子祠

劉大章

仰止欣登夫子堂森森古柏蔭宮牆千秋太極心源接一  
卷通書性理藏自有輝光爭日月可堪祠宇尙荒涼景行  
無限低徊思樹色溪聲與共長

詩 五排

宋

奉 齋 借 國 身 觀 落 成

轉運使 程元佐

玉冊登真久琳宮肇祀初翠簷連曉日鸞榜賁仙居邃谷  
穿青嶂橫流漱綠渠重樓添氣象峻宇出邱墟真境靈猶  
在奇峯畫不如斗壇來鶴馭烟岫駐麟車溪水長清淺山  
雲自卷舒猿啼蘇隱宅鹿引葛洪輿破臼香塵散温池秘  
劑餘霓旌搖夜月玉節擁天書日脚隨香篆松聲雜步虛  
遺風崇隱逸温詔振凋疎徽號君恩重嘉封帝祉儲清芬  
流薄海奕世德淪胥

和運使修陽昇觀落成

邑令 吉康國

被命經營始鳩工結構初深巖開奧殿高敞稱樓居室外  
飛簷巖巖限夏屋渠鐘聲薄霄漢祠事走邱墟遯世誰能  
儼登高迴莫如鶴遊三島駕人望五雲車綺井風光潤疏  
寮月影舒威儀模紫極形勢鞏堪輿池有泉珠舊壇空級  
石餘霓旌那復下絳簡更誰書童子追前躅愚生泣大虛  
烟霞猶赫奕松竹自扶疎封號方連進休祥已密儲躋茲  
仁壽域率土慶于胥  
皇清

春日祝周撫部

劉友光

曾聞南極迴春至照平津鳳轉瓊房舞雲開玉節塵探書  
因到西維嶽自生申青鳥風時下紅綃扇賜頻明時逢浩  
蕩開府自清新宴濕桃花雨盤浮芝肉春絳鞬爭避路蒼  
玉獨垂紳全樹承天罷交梨散席珍遂聲邀鶴步松酒漬  
龍鱗文武分呈露安危合倚身簾疎開翡翠符下刻麒麟  
楚澤容莊叟狂歌祝大椿

上臺諫鄒小山先生

劉其輝

山斗專時望鈞衡世所希鳳凰鳴國瑞獬豸肅朝儀明詔  
承楓陛霓旌指粵陲選山偕白也鐫句補延之一鑑秋空  
麗雙竿燭影移名言欽古鼎妙義晰芬絲玉尺量維謹醇



醪醉者采天香携袖滿墨瀟灑人奇針芥許相合形骸了  
不疑良材胥斲就末席荷榮施鎖院門開早湘干帆去遲  
使星歸 秘閣

溫語下、彤墀氣宇隆三殿風聲樹百司津梁應共仰台  
鼎更何辭桃李妍春日鷓鴣唱暖時高軒辱過訪下走漫  
呈詩盛讌招羈客常華接秀枝慚將潘岳鬢對此孔融卮  
願假垂天翼扶搖慰舊知

寶寧寺訪宗能上人

陳治灼

細草迷山徑鳴泉雜鳥聲雲排千谷暗烟簇一林平梵宇  
臨流結刹竿盪日明廣庭馴雀下丈室伏龍驚窅窅迴廊  
蕪光輝動玲瓏搏鐘僧出定檜杖客尋盟寂寂襟裾淨陶  
陶几席清水風梳耳目文字暢心情勝蹟空前代仙踪播  
遠名當機窺有象容我話無生

追懷王念亭先生五十韻

陳圭

有道如今日何人似此翁勇從急流退生得大年終骨相  
森孤鶴聲華翼九鴻恩加猶子姪獎借自兒童夜室深難  
見鄉山思不窮水南文府地江左相門風秀挺麟峯出香  
抽蕙晦叢鯉庭真豁達鴈序特清冲才大開天授家貧運  
海空燃松鴛舍內警枕羽陵中卓犖懷前哲精勤擊幼蒙  
枌榆生氣色鷹隼指飛翬落手黃河決騰身紫蓋崇錯磨

天廟壁剪拂玉臺驄澹墨科名峻銅章寵命隆鳧飛徵令  
烏虎拜出

宸楓掌節來京輔盤根理靜戎縣當官道劇民仰宰臣公  
電掃清文牘風行肅猾雄春臺歸煦育夏屋一瞬幪鬼瞰  
高明室人讒正直躬免冠回憲注抽玉達

皇聰特表三薰上危途九折通奪情留守制移孝實資忠  
勢起排雲翮心驚罟網蟲乞休閒秉鐸望遠促歸蓬自謝  
簪纓侶兼忘琢削功荷鋤人感泣鼓篋士心悅家衍青箱  
學門深一畝宮三槐承日蔭五邨簇烟濛清夢酣吟榻元  
音入嬰桐不留州府跡長喜歲年豐述作匡劉業流傳筆

翰工蜀人遺酒榼大吏致書筒後進欣推激微生許  
憶從親道履常得快私衷勝日追遊賞長城引戰攻看  
諸寺宿起草落繁紅永叔憐蘓軾嵇康愛阮种詩源常  
授書澤覺心克陶汰三唐律摩挲百鍊銅辨香祝緯幄放  
鶴出雕籠知己吾何托先生古與同未能回白首竟欲問  
蒼霄小別春如水遙天氣斷虹無才酬盛德有淚滴雙瞳  
舊帙空盈笥長年尙轉蓬雖然遊汗漫誰與拔菁蔥攬鏡  
頭將禿屣襟理亦融可能湘水曲一障百川東

次明經洪竹嶼先生六十韻

邑令 裘行恕 新建

岫巖峰鑄篆滄浪水濯纓南條開澤國三楚錫嘉各地接

揚梁豫州編冀充弁羽毛方物貢栝柏異材呈訓俗宜三  
 德談經祖二程士風淳近古之子美如英廣昔齊稱駕疆  
 原共隸荆省旋分兩兩莪亦判菁菁嶽喜微雲颺湖驚駭  
 漢臺封圻劃界限令典重真誠復剖成偏邑云期利厚生  
 柳綠城見重花好縣誰輕液水環流遠鸞山托地貞仙巖  
 芳草碧巖獻花古洞暮雲平紫雲洞七里嵐光靄三台夜氣清  
 接龍濺活潑插劍靜澄泓插劍泉虹彩因秋淨雲橋秋色梨雲遇  
 雨傾龍湖梨花月隨人共影丹陵夜月鶴解我憐卿北仙招鶴皺透詩難  
 狀酒泊花石青蒼畫不成斗壇翠嶂跡留仙子步金溪仙跡濤借伍胥兵  
 龜嶠觀濤飯偶餐雲母鹽疑啖水晶欵冬煤作友消夏藕呼兄

例此皆風景憑誰代表旌久知農最苦肯使吏相驚春永  
 秧千頃秋成稻百莖穗搖風力健車急水聲勅竹翠森篁  
 鳳松濤吼石鯨呼羣看鴨過啄粒聽雞鳴犬爲防門吠羊  
 因賽社烹蔬籬編枳幹小屋架椒楨垂老終棲畝長年不  
 入城柳陰談歲事隴畔說鄉評蠢蠢原無識蚩蚩是此氓  
 街頭沽濁釀樹脚聽流鶯鷺集橫塘白蠅飛過案翫偶收  
 鍾數倍便覺用差宏處處完倉廩村村競鼓笙真堪名樂  
 土端合號銀坑縣屬地名斗酒虔歆蜡兼豚敬祭訪兒童咸躍  
 躍父老敢莘莘大有書頻歲宜春帖滿楹悉田家快事實  
 此地民情更有人文藪應垂金石聲海天身可蹈洪兼訪雲蒸死

海寇霜雪刃偏迎洪雲虬博雅傳家學有經史各書明良

叶帝賢彭方伯友信以和豐碑纔共立會家舊序旋更新

嚴一心洪武帝詩得官孝謹三年守洪際渭守孝三詩憑二柳爭洪圖南

著一柳二柳堂詩集鄉賢與循吏軒輊待權衡泮藻蘭斯馥書林玉

比瑩雞窻朝朗朗螢火夜熒熒秋水文瀾潤春華上苑盈

要全編次序在大氣蟠紫實則師檣机辭仍賤白珩斯能

真意永不使悔心萌句豈垂雲下聲偏擲地鏗自堪成一

子直可補由庚我本官如寄年來卦少亨人雖參毀譽

貴緝光明有客鴻章富俾予晝錦榮聊摹荆楚託相與

投瓊

詩七排

明

詠雪與李西涯聯句

彭澤

詰屈樓臺宛轉風李鐘鳴曙色到簾櫳六街踏作銀河路

彭雙闕瞻疑玉帝宮縹緲夢隨旌旆杳李顛狂嗔見蝶蜂

叢閉門穩稱袁安卧彭學句偏憐謝女工愛舉輕裾承委

籍李慙將短髮競飄蓬墻東着日先消盡彭郭外尋梅正

擬同夜靜隔窻聞折竹李雲迷遠樹詫垂虹藍關瘦馬迢

迢去彭剡曲孤舟渺渺通厭客總仍僮倦掃李題詩却賴

酒相攻罌瓶剩貯煎茶水彭蓑笠慵開把釣篷醉眼豈勝

花作陣李微軀多謝火能烘黎陽妙曲今誰付彭灞上幽  
懷想未窮平野已無三窟兔李冥淵徒恨九霄鴻城頭月  
黑愁吹角彭磧口風寒憶掛弓漢使老餘青海節李曹郎  
驕驟鄴城驄萱芽出吐看全坼彭峰頂摩空勢欲童試拂  
丹梯捫斗柄李誤開金剪奪天功舞衫亂點如添繡彭獵  
騎斜披不受幪墮落泥塗翻自惜李鋪成溪沼亦旋空頽  
堆倒岫從兒戲彭北壠南村且歲豐越客到時驚始識李  
郢人歌罷覺難終長號赤脚哀嫠婦彭獨坐攣肩怯病翁  
世事炎涼真覆手李乾坤淒黯實盲瞳旅遊對此仍羈絆  
彭莫怪篇成大劇匆李

與潘時用夜宿聯句

城頭落日散飛鴉彭樓外回風送斷笳潘留客坐深忘睡  
旦李分題吟就倚燈斜彭奚奴貰酒勞歸市潘候吏趨朝  
欲報衙李星影動搖天自轉彭漏聲迢遞夜還賒潘瓦爐  
宿火頻催藥李竹儿看書更啜茶彭獨鶴夢寒聞警露潘  
羣鴻路遠憶鳴沙李六街行避金吾邏彭比屋從教稚子  
譁潘吻渴正思仙掌露李興豪疑上月宮槎彭側身天地  
空雙劍潘過眼糟糠謾五車李虞詡有才終作郡彭杜陵  
多病久無家潘嗟予淺薄聲名在李感子殷勤禮數加彭  
弱質敢辭依玉樹潘非才何以答瓊瓜李龍門舊地容攀



接彭牛角長歌肯嘆嗟潘薦達幾年懷忝竊李飄零何處

問生涯彭雲霄好在須平步潘竹帛從來豈浪誇李蘭桂

不隨桃李盡彭璠璣寧受砒砒瑕潘詞章耻擅雕蟲技李

才學真成射斗華彭世事紛紛翻手雨潘人生滾滾落茵

花李雄談莫倚臧三耳彭知己今逢鮑叔牙潘醉裏狂言

披豁甚李據床時起岸烏紗彭

皇清

秦中吉農部枉過感謝時余爲仇家所中吉無一面大責當事不爲直枉

劉友光

迢迢天半羨朱霞碧映响嘯嘯未有涯湘漲橫流迷杜若秦

風宛在憶葦葭石渠藜沒三更焰玉遂梅吹五月花豈獨

含情憐越石更持太息到長沙蓬心未解江湖遠茅屋還

依風雨斜川媚珠明思化雀杯留弓影尙驚蛇酒酣漫拭

三搗鼓春去全荒五色瓜車馬不因門巷冷還來江上聽

琵琶

秋日寄臨江道施愚山

無邊秋色向湘沅皎皎蒼葭露已繁宋玉一生悲楚澤少

陵垂老望夔門白雲湖淨留水鑑碧嶂亭閒出皂旛馬廐

無聊羞客友時余友次侯墨莊零落媿童孫清江有劉青

萍含恨空留匣黃葉行吟舊有村當代共知推有道一言

寧惜重何蕃殘羹四海多垂涕全樹空庭易借恩奉母自  
傷無弟妹絕裾難可逮雞豚軍儲近稅垂竿戶詞客空招  
剪紙魂看菊不辭還冒雨披葵遙望莫傷根幾時索帶歸  
鈴閣倚壁同看梭化痕

述懷呈龔芝麓先生

笑逐東風更倚門絳紗猶怪鄭元存酒家傭保名徒變漁  
父隣居花有源蛇影日常先到蓋鶴鳴意豈欲乘軒祇緣  
瓦雀頻經繳難免羝羊聽觸籓金馬詆諸真避世王杯冷  
落亦窺園蓼中得趣無非苦李下成蹊自不言憔悴有鄉  
原故里蹉跎今日負深恩琵琶易下江州淚鸚鵡休招夏

口魂到處殘羹驕杜甫幾人縱酒憶平原看花空挹春天  
好炊桂時聞主者尊寂寞五侯烟已散空餘柳色月黃昏  
近詩一字不存悉火之旣成四絕句復賦長句十韻

志感

陳夢元

燼後枯腸吐復收慚懸短綆汲深幽叩來一字貽歆仄改  
罷新篇怯獻酬追悔已憑魂夢攘宿疵仍向膝腰廖不如  
虛費隨觀燎及蚤銷聲耻抗喉徃徃閒情增觸撥孜孜道  
古解歌謳滌瑕蕩垢移時淨累氣蕪音結我愁泛徧雨雲  
湘澤權哀綿屈宋賦心秋沈冥茗輩和乖雅謔浪深閨語  
雜優腴味三餘連李架梯攀六代陟蕭樓拾遺晚節招誰

醉轉益多師到白頭

一尉署內有秋蘭十餘盆香甚郁烈大抵是蕙足發幽沉之思矣爲疊前韻東尉使招能吟者和之

衆芳珍重晚蘭收畝蕙迎涼標致幽冷暑酸寒滋樹並隱囊吟翫秘妍酬分料蕊瓣香名錫直剔根莖別種廖閒副蕭晨調羽管譜來纖指媚歌喉已聯荷芰池邊伴竊聽風騷澧上謳望遠綿綿思舊約凝粧淡淡按新愁無言宛贈當窻紫妙賞忘嘆苦雨秋撥俗何妨勤掃溉談空猶是類俳優出逢仙尉堂鳴鴨歸掩山扉月照樓看貯磁盆兼綺石宵深采徧楚江頭

蘭花有名樹蘭者兒姪索詩詠之仍疊秋蘭韻勉塞

其意

驚見青葱滋樹收崇蘭嘉藻貯深幽闕遺騷雅香名錄投贈瓶髡弱幹酬韜去汙泥根乍硬擢超荒穢蟻焉虜擁培瓦面繁敷萼些助歌章利轉喉倍洩揚揚聲響韻慵調賀賀羽聲謳園林恰副羣稱祖階砌何如此遣愁國豔絕殊魁九畹玉顏森聳殿三秋未知山澤多年茂儼列冠紳委佩優攀折當檐探畫閣濃熏撩檻媚高樓桂叢馨放招延佇空谷孤寒仍掉頭

挽宜章曾門李烈婦

陳煒

杜鵑啼徧北山岑惆悵秦樓慘莫禁廿載釵分孤鳳杳半  
牕雲鎖暮鶯吟貞魂未許波翻井香骨空餘字剪金破鏡  
難圓春寂寂明珠已墮夜沉沉燕能作伴家何在鴛不爲  
媒恨轉深荒塚烟銷連理木洞房霜冷斷絃琴塵緣怕聽  
雞催旦冥會應憐鶴在陰鼠首男兒真愧死青閨誰許話  
同心

詩

五言絕句

明

舟行阻風

彭友信

南風不可上繫纜泊舟渚微波如有情一夜隔船語

春溪港

老龍潭底眠不知春已到只因溪上雷驚起潛龍攪

南山

彭澤

南山近爲隣雨過更幽寂開牖對鳴琴翠色長在壁

北浦

斷渚蘋來合長隄樹接連停橈風正急月出更移船

江上別友

胡湛

雲鴈沙邊少晴鷗江上多一杯千里別折柳意如何

雜詩

胡養真

城頭多芳草清露長天曉託跡非不高縹緲爲秋老  
皇清

曉過長沙

歐陽一瑞

江城銜曉日烟鎖禹碑亭極日黃陵遠君山一點青

朱亭

劉先

覺來天未曉露濕人行少月斜星尚明枝頭有宿鳥

靈龜峯古松

洪柳書

覆蓋隨俯仰輪囷日影迷上有千仞石下臨百尺溪

黃坪洲晚憩

焦爾璞

綠樹茅簷靜白雲野簌香行行青草拂夕月映斜陽

溫泉

王純鎔

清泉涵素秋夜靜龍鬚浮問侍東昏宴金盤得薦不

朝斗石

仙人圍碁處石壇倚天峙世上遺萬緣碁中較數子

陸城雜詩

陳圭

西湖

葛衣涼風天櫻鞋香草路不見采蓮人花間浴雙鷺



雲溪驛

一夜水聲中不驚倦客夢曉來衣裳濕始覺溪雲凍  
南關

城南少行舟湖頭水尚淺好風當面來草平綠如剪  
石橋

葦湖石橋平行客不停步橋下湖水深漁人忘日暮  
玉尺堂

草堂剛十多坐可消煩暑半塢嶺頭雲一樽花外雨  
馬鞍山

西抱大江流南望高雲起誰知山上人鄉心一千里

湘江道中

文自奎

旅况本淒其寒天風雨颯荒村晚歸人遙見高峯雪  
已是故園身依稀官舍夢別路指江臯湘天烟霧重

詩 七言絕句

宋

司空山

李韶 鄱州

鶴馭凌空入紫微  
水盤山遶五雲飛  
杉松老盡無消息  
猶得千年一度歸

元

黃鶴樓

馮子振

鶴樓千尺倚晴欄  
大別山前舞峻鸞  
昨日英雄無問處  
依然江漢湧波瀾

寄馮海粟待制附天目上人過廣陵 張雨 錢塘

天目峯頭一鶴回  
白雲持贈當寒梅  
瓊花觀裏爭開處  
奇得元砂白紙來

三都一序爭傳賦  
借重西州皇士安  
慚愧山圖經品藻  
苦心留與後人看

昨日淮南召八公  
揚州擬看醉圍紅  
賺人雞犬雲中去  
策轉江頭控鶴童

明

和李一初狀元口號

彭友信

故園田地久拋荒  
周粟無心聽歛穰  
豈但首陽薇可食  
山中更有禹餘糧

斯文未喪道先窮  
老却蘇郎大澤中  
漢節無旄羝不乳  
烏書懶寄北歸鴻

試罷值雨

棘闈戰罷近黃昏  
出院便沾雨露恩  
久袖商巖濟旱手  
要添新浪過龍門

陸秋官賞菊

彭澤

故人邀我賞名花  
同到城西陸九家  
爛醉樽前聽白紵  
不知落日下殘霞

飲水

楊一清

雲南安寧州

入畫晴江曉色分  
東風吹碧盡成紋  
買舟欲過三湘日  
應

挹清波弄白雲

登靈山

易舒誥

攸水東來幾千折偶然一峯江上立截斷洪濤欲倒流灘  
下時時弄嗚咽

夜雨憶友

洪雲蒸

小江江上舊相携此日濤聲滿綠溪我寄簷前聲數點和  
風和雨到江西

寶秀驛

文士昂

萬竈烟消刁斗嚴龍沙人靜月纖纖此身此夜愁千斛卧  
聽銅鈴夢未恬

龍池

譚民望

東風吹雨下青巒池水深深色正寒箇裏潛龍何處覓莫  
教鱗爪帶泥蟠

皇清

陳五聚

一峯閣

曉翠當樓映遠松隔牕遙望露華濃伊人獨擁離騷卧知  
在芙蓉第幾峰

出武陵西郭望桃花源

蔡來徵

武陵谿畔草萋萋傳說仙踪路久迷我欲問津從此去花  
源尙在武陵西

淶溪春漲

淶溪幾曲抱平沙兩岸垂楊映碧涯  
小艇乘空飛擢下春來新水漲桃花

登憑虛閣

陳履謙

潭影山光細細分岸楓初醉又斜曛  
臨流欲寫倚闌意一片輕風捲暮雲

答門人衡山譚吏部尙箴

陳之騷

曾無消息問春華也解陸庄非餉家  
二十年來桑椹老鵲音今始到梅花

簾除鎮日冷香煤忽報燈花鬱小蕾  
雙鯉知音不待剖寒

溫以外無多裁

漫歌

身作神仙樂未歸瓊林金殿鬥奇才  
春風寄語司空道五色荷花賀我來

詠懷

陳五松

風吹荷葉滿瓶香野色遙連日色黃  
最是詩人安穩處欣然擊壤詠陶唐

急雨初過景物奇殘荷叢竹共催詩  
便須置酒呼同舍更對殘花把一卮

傅範伯學師捐置啓聖祠匾額油燈  
歐陽再思



玉額銀燈啓聖懸  
文峯秀水繞中邊  
競傳天上日星麗  
不似山僧古佛前

古梅

吳學謙

滄桑幾度任飄風  
不落時人白眼中  
欲問何年真甲子  
長生藥在廣寒宮

羅灣河

劉兆鵬

長江如帶水連天  
駐馬行吟落照前  
烟艇棹來催客泛  
旅亭遙指暮雲邊

登朝斗石和李澄川

王純鎰

別是乾坤一放翁  
仙因佛果總成空  
石榴甕滿不能醉  
讓與先生待葛洪

山中曉起

彭廷梅

五更睡起絕聲聞  
天似鴻濛未易分  
遙望前村茆屋裏  
曙雞啼破嶺頭雲

隱真巖

鄧世謙

障礙全無信隱真  
洞間花發四時春  
幾時採藥丹巖上  
別有荷香不染塵

憑虛閣

焦爾璣

澄江如練瀉長空  
傑閣憑虛帝座通  
急管繁絃人盡醉  
萬山蒼靄月溶溶

出方廣細雨空濛過嶺天氣清明

劉林青

佛留吟展施花雨天縱遊情放翠巒為報嶽靈誠有意他  
年棲隱任盤桓

寄文西垣

陳圭

錯刀玉案惜殷勤十日平原袂始分僮僕轉驚行李重擔  
頭七十二峯雲

時西垣以南嶽圖見贈

白露春流綠滿汀垂楊垂柳色青青行人繫馬頻回首不  
住鶯聲五里亭

仙人橋

洪誥

兩峯對出碧雲中一水潺潺路絕通好是女媧留片石補

天未已補山空

宜興陳其年集列海內名士姓氏於集首吾家桃文

先生名在焉題二首

陳夢元

雕龍才子泝淵源陽羨清華映島孫不是揚雄沉博後誰  
歟載酒問吳門

一瓣香為誰氏燒伯牙絃絕痛難銷司空山裏人何在五  
色蓮花尚未凋

題戴東原屈子賦注後

騷魂千載怨何停江上秋蘭葉葉青寄向蛟龍傷水底幾  
人解說侍中經

題戴東原新刻水經注後

天涯楚客展桑經  
片片秋帆下洞庭  
自古江河南北異  
知君心已入滄溟

舟中雜詠六首

陳 峻

醉別長沙興未闌  
滿船新月卧窓看  
人人共道昭山好  
為趁秋風夜已殘

過昭山

檣蒲可照說湘江  
清絕誰家玉笛腔  
漫以舟人譌附會  
渡河艇子自雙雙

湘河口

巖厂猶然佛放光  
居人也解說詩狂  
香一瓣舟中祝涕  
淚為霑杜老裳

鑿石寺

雨後維雄鎮古洲  
濱仰止為宗噴雨雲  
過此敢斬神意格  
低頭默誦禹碑文

過衡山

岫嶼神碑秘跡嚴  
好奇韓子到山尖  
振衣我欲臨虛往  
自有猿猴綠樹潛

岫嶼峯

細浪含風白石瑳  
千尋翠黛遠相摩  
篙工亦愛晴天好  
漫說山容似苧蘿

入小河

題帆隨湘轉圖

陳之綸

秋林葉下洞庭南  
無數山容面面諳  
俱向衡峯插天半  
北風吹翠忽成嵐

曲折風迎上水帆  
白雲堆裏擁巉巖  
漁人慣逐湘中棹  
遙

看高樓月已銜

偕友人登靈龜峯憑虛閣

劉玠

孤峯礫卓少朋儕梵閣峻嶒倚巖崖不是陰山稱絕勝良  
辰何處縱吟懷

檻外洋湖滙洙江澄波似練靜奔瀧筆床茶竈粗安置擬  
效陸公泛一雙

龍筋松瘦山根絡鳳尾竹踈石罅攢比似花穠堆佛髻不  
曾些子放教寬

乘興芒鞋數往還吾曹得助本江山輸他塵網勞勞客也  
自來分半日閒

詩補編

與部使同遊司空山

宋 吳居實 攸令

王官身已達所悅多紛華區區市與朝輕煖事窮奢我公  
味冲澹止樂山水嘉肩輿靡厭尋謝興無津涯杖藜適意  
遊對逕穿迂斜回憶掛冠時息此避諠譁骨相有神仙得  
道成全家遺跡富覽觀高步凌烟霞靜中白日長玉宇清  
風賒睹茲神聖迹喟然興嘆嗟

樞密大尉吳公昔官於攸與部使遊司空山留詩於  
山之朱陽觀後四十七年元佐被旨修觀檢視得公  
詩於奧突間清竒可挹惜窮山遠谷士大夫不能涉

久而未有傳者然歷歲綿遠遺編燦然豈所謂在在  
有神物護持者耶爰刻諸石以久其傳 程元佐跋

遊天蓬巖

明王偉

偶向天蓬巖上遊五雲開處見神州千厓雨過青如染六  
月涼生冷似秋山茗自將烹石鼎胡麻誰見泛溪流尋真  
我欲凌空去肯學凡夫卧一邱

留題甘棠寨

王偉

甘棠山上甘棠寨峭石懸巖長薜蘿離亂昔年勞戍守大  
平今日息干戈落花啼鳥光陰促流水浮雲感慨多世事  
悠悠何足問不如對酒且高歌

重修楚大夫宋玉墓

有序

國朝陳圭

墓在澧州安福縣長樂鄉左畚水右浴水唐詩碑  
文風雨剝蝕玉旁缺點人遂呼爲宋王墓今土人  
且廬其上矣澧人詳考志乘及李羣玉詩鳴於官  
得修復豎碑徵詩以紀其盛

登毬門兮清秋日西極兮悠悠浴之水兮畚之流中騷人  
兮靈邱靈何適兮故楚魄焉化兮故土海生塵兮桑田山  
吹蜃兮棟宇猿古木兮叫雲鬼幽篁兮嘯雨昔岌岌兮大  
言今奕奕兮墓門鶴來歸兮自語朝東出兮清瞰澧有蘭  
兮香菲菲氣氤氳兮降靈旂蕙徽蒸兮遙席士籩房兮依



依哀吾生之焉薄兮懼荒穢之沒芳草刻吾舟以求劍兮  
名虛託而身老賦楚些以歛歔兮惜風流之文藻羌冥冥  
以相余兮策余馬於中道設不忤於前修兮又何有乎枯  
槁艤君山兮荃橈挹仙酒兮木瓢臨下風兮將之天一碧  
兮沈寥

秋夜不寐偶成小詩示攸令載春岩主人

時嘉慶己巳五月攸邑被

道憲

保寧亭

驚聞遠水漣山城馬足倥傯又此二睡裡生涯隨夢轉夜  
來秋氣逼人清當車螳臂全無用中蜜蜂房勉自營縱目  
未堪流覽處頽垣碎瓦不勝情

和韵

試用

丁

鈺

長洲  
拔貢

洪流白晝打山城屋角都撐木筏行岸走蛟龍腥氣染膾  
留禾黍晚香清飛章入告叨

恩速繻節親來并力營聞道中中醒旅夢蒼黎飢溺總關  
官書催我赴荒城斷岸殘堤策騎行村寂不聽門剥啄蓬

栖恁耐露凄清歲希上稔猶堪  
艱產破中人匪易營讀罷  
頽垣碎瓦句一腔憂憫寄詩情

和韻

邑令 蔣紹宗 長白

平原數尺漫荒城乃速朱旛  
肯暑行已渴爲懷民愠解推  
息及下樊源清三旬日食皆營  
心半萬蠅居已代營寄語  
卽安諸赤子須知憂惕此何情

和韻

余世本 邑人

連宵暑雨溢鄉城父母憂深  
地急行天遣人間生佛至星  
移秋首熟禾清忘餐廢寢爲  
誰苦破屋頽垣可漸營還沐  
皇恩長輯定側聞唱和感慈  
情

